

東
華
續
錄

東華續錄

光緒八十八

臣朱壽朋敬編

臣潘鴻鼎恭校

二月癸未朔諭朕自冲齡入承大統仰蒙 慈福端佑康頤昭豫莊誠皇太后垂簾聽政愛勤宵旰十有餘年中外奠安羣黎被福上年 俞朕躬親大政仍俯鑒孺忱特允訓政之請溯自同治以來前後二十餘年我 聖母爲天下憂勞無微不至而 萬幾餘暇不免稍資頤養撫衷循省實覺寢饋難安因念西苑密邇宮庭 聖祖仁皇帝曾經駐蹕殿宇尙多完整稍加修葺可以養性怡情至萬壽山大報恩延壽寺爲 高宗純皇帝侍奉 孝聖憲皇后三次祝嘏之所敬踵前規尤臻祥洽其清漪園舊名澠擬改爲頤和園殿宇一切亦量加葺治以備 慈輿臨幸恭逢 大慶之年朕躬率羣臣同伸祝嘏稍盡區區尊養微忱籲懇再三幸邀 慈允欽奉 慈旨自垂簾聽政以後夙夜祇懼如臨淵谷今雖寰宇粗安不遑暇逸之心無時稍弛第念 列聖勅幾聽政問民疾苦凡苑囿之設苑狩之舉原非若前代之肆意遊畋此舉爲皇帝孝養所關深宮未忍過拂況工料所需悉出節省義餘未動司農正款亦屬無傷國計但外間傳聞不悉或疑圓明園工程亦由此陸續興辦則甚非深宮兢惕之本懷蓋以現在時勢而論固不

能如雍正年間之設正朝建公署即使民康物阜四海乂安其應仰紹 前猷克光令緒者不知凡幾尤當審時度勢擇要而圖深宮隱願所存豈在游觀永飭想天下亦應共諒惟念皇帝春秋鼎盛此後順親之大尤在勤政典學克己愛民不可因愛意奉親轉開逸游宴樂之漸至中外大小臣工尤宜忠勤共勵力戒因循浮靡積習冀臻上理庶不致負深宮殷殷求治之意實所厚望欽此朕仰承 慈訓惟當祇服懷遵不敢稍涉侈縱諸臣亦應仰體 聖慈諄勉至意各勤職守共贊昇平現在西苑工程將次告竣謹擇於四月初十日恭奉 皇太后鑾輿駐蹕其一切值班守衛事宜均照王大臣等前奏章程敬謹辦理爲此通諭知之○諭軍機大臣等文碩奏商上申覆情形請飭實議並附陳管見節錄前奉諭旨各摺片覽奏均悉降吐設卡一事前經疊諭文碩令其開導藏番趕緊撤卡以爲保全該番之計朝廷於此事權衡利害度勢審機籌之至熟前寄升泰電旨業經詳諭文碩於此事籌及軍旅殊屬昧於事情不顧大局所請實議之處著無庸議目下事機緊急無論降吐屬藏屬皆將來自可辨明現在總以撤卡爲第一要義升泰未到以前文碩責無旁貸仍著懷遵疊次電旨剴切勸諭迅速撤卡即令印兵已到強弱勢殊藏中番兵不可與之接仗至我兵駐藏無幾尤宜嚴加約束毋得稍有干涉致生枝節將來難於轉圜至電寄諭旨均係軍機大臣讀旨後繕擬呈進欽定交該衙門電發辦理已久從未舛錯遺漏況自設電以後

一切調兵籌餉深資得力並無流弊尋常文件不准用電更無庸另立章程文碩謂收取電氣費須神明尤屬迂謬可笑均無庸置議升泰現在行抵何處著卽星速前進文碩俟升泰到任後卽行來京不准稍涉逗遛○美國要訂禁止華工赴美條約六款出使美國欽差大臣張蔭桓以聞奉 朝議以是約不利我國廢之○岑毓英奏生財之道不外乎開源節流量入爲出滇省文武各官廉俸緣防各營軍餉及添造器械軍裝等項一切費用需款甚鉅等再三籌畫莫如振興茶利以雲南普洱府屬之沿途各土司地內有五大茶山名曰倚邦曰易武曰漫乃曰漫撒曰攸樂地有千里產茶頗多味厚色濃甲於他省祇以土人性笨工拙不善製造一經行遠則茶色香味俱減向止銷於本地及川廣等省職此之故而核計每年所收茶釐爲數無多周諮博訪皆由商人於糯紫江邊及黃草壩等處繞越偷漏所致今若將普洱茶仿照閩廣洋裝製法則富商大賈必將雲集爭購約計歲入茶價稅釐自必大有可觀當經檄飭督後局司道會同迤南道體察情形悉心議擬請於思茅廳設立官茶局另於茶山輦地分設子局凡遇山茶上市悉歸官局領票買賣其釐金茶稅亦由官局經收所有製茶工役器具已由領辦給經費赴閩粵湘鄂等省僱募購買並擬調熟習商情洋務之湖北候補知府鄭思賢與留滇補用知府卓經芳經理其事又飭委員熟悉地方情形之紳士直隸補用道楊景修於糯紫江邊黃草壩等處扼要設局查驗以杜繞

越偷漏總期實事求是將茶利涓滴歸公俾得上裕 國計下富民生庶幾邊地多開一財源即多得一分釐稅於邊省大有裨益得 旨如所請行○甲申戶部奏光緒十四年正月十七日欽奉 諭旨辦理大婚典禮戶部去歲籌撥外用之款二百萬兩著戶部全數提撥來京由禮儀處交進其俾辦外省應需之款由禮儀處隨時奏明核定價值請領由內支發再辦理大婚之款四百萬兩尙不敷用著戶部再行籌撥一百萬兩先行提撥二十萬兩亦由禮儀處交進其餘八十萬兩陸續籌撥欽此○戶部恭查上年五月間欽奉 諭旨大婚典禮應需款項著戶部先行籌畫銀二百萬兩奏明候旨辦理等因欽此當經臣部於各省應需解部款內分別勻撥內撥十三年部款一百萬兩十四年部款一百萬兩奏明行令各省敬謹照數備齊一奉提撥即行報解不得稍有延緩在案茲欽奉 諭旨將去歲外用之款二百萬兩全數提解交進自當由臣部飛咨各省關照臣部上年指撥改撥之款迅速欽遵辦理惟查各省之路途遠近不同勻撥之數目多寡不一且內有現籌之款恐不能同時一律解齊擬俟各省陸續解到時暫存部庫湊足四十萬兩交進一次分爲五次二百萬兩交齊續行籌撥之款一百萬兩擬由庫儲六分扣平項下先行提撥銀二十萬兩其餘八十萬兩容臣等盡力設撥籌有庫款再行奏聞得 旨允行○張之洞等奏瓊州府昌化縣境內大艷山府志名嶼靈山多產銅及石綠故亦名爲石綠山前經香山職員張廷

鈞招集股分購備機器前往開採業經奏明在案查石綠爲銅苗所結下有銅礦精華上溢融爲石綠每石綠百斤佳者可鍊銅十餘斤至二十斤不等其不能鍊銅者實作顏料茲查大壘山地近黎境道路既連瘴癘尤重出產雖佳工費甚昂現在黎境甫通礦務創始倘無確利可圖必致觀望自阻惟有減輕成本始足以徠商販而惠民黎茲擬將昌化石綠及銅斤凡販運出瓊州海口者自光緒十四年起三年之內所有山稅及關稅釐金概行暫免俟開採所銷大旺再將稅釐酌量抽收其餘瓊屬五金等礦如有集資開辦亦卽一律辦理暫免稅釐庶幾通商惠工利興而爲民裕矣下戶部知之○乙酉諭本年輪應查閱湖北湖南雲南貴州四省營伍之期湖北卽派裕祿湖南卽派卞寶第雲南卽派岑毓英貴州卽派潘蔚逐一查閱認真簡校如有訓練不精軍實不齊者卽將廢弛之將弁據實參奏毋得視為具文○丙戌以奎俊爲福建按察使○諭福建按察使裴蔭森著開缺以三品京堂候補督辦福建船政事宜○諭前因御史牟蔭勳奏參山東煙臺海口防營統領孫金彪營務廢弛縱勇擾民各款當經諭令張曜確查具奏茲據查明復奏孫金彪既無縱容營勇游蕩搶奪等情卽著毋庸置議惟副將李連德於駐營地方騷擾民女究有不合李連德著革職留營以示懲儆○丁亥祭先師孔子遣恩承行禮○己丑李鴻章奏欽奉光緒十三年九月十二日寄諭鄭州決口將來堵合後河流依舊北趨著趁此潮流驟減易於施

工將東明長垣開州一帶河身及時挑濬並將兩岸堤埝加築堅厚等因仰見 朝廷先事籌防至意欽服莫名臣於鄭州決口後業飭前任大順廣道誠勳督同在工員弁將直境黃河詳細察勘趁此水落分別籌議稟辦並於上年奏報另案工程摺內陳明在案欽奉前因又迭飭現任大順廣道羅錦文署大名管河同知姚弼並添派委員前往確查河長八九十里寬數里若舊往挑濬工程極大需費極繁重力萬萬不及卽於北面酌量抽溝數處亦需土方銀二三十萬兩且汛漲水勢鋪漫而來不能以人力束入一二十丈之新溝避出南岸老險勢必旋挖旋淤工無實際未敢虛糜鉅費測量兩岸河灘高於中洪一二十丈不等河身尚可容水惟東明上中下三汛南堤六十餘里均有險工歷年盛漲衝刷未及加培其單薄處所亟應擇要修築藉資抵禦據羅錦文督同姚弼等擬分別加培套堤大堤使其高厚堅實並添築前後戢堤幫寬各壩尙合機宜臣已調派大名鎮總兵徐道奎所部練軍步隊卽於春融赴工力作一面募僱民夫同時趕解並購西洋小鐵路五里連運土鐵車一百輛由堤外遠處運土往返捷速省工省費又開州境內金堤九十餘里向爲北岸保障年久失修殘缺已甚若不擇要加培實虞離河較近之處汛漲北越亦經派員會同該州勘估及時僱夫修辦以上土方工價並鑲埝備防料價銀錢雜物鐵路購運糧食等項所需不少容臣督飭藩司及天津釐局竭力措湊應急至長垣南岸本止小堤離河較遠向無汛

守尙可緩辦此外北岸民埝分飭各該州縣勸諭民間自行設法修培仍不得逼東河流致礙大局其有未盡事宜容飭該道等隨時察看妥籌防範以期有備無患下部知之○庚寅朔 日於東郊○壬辰岑毓英奏普洱府分防他郎通判所轄木受寨地處極邊外與越南連界內與臨元接壤相距元江他郎城署均有六七百里其地山深箐密漢少夷多有土匪陳定邦陳靖邦兄弟前乘越南之亂特往勾結就地匪類占據越南猛萊州屬之里方普方兩地光緒十三年五月間陳定邦等糾匪百餘人回臨木受寨擄掠元江六能村拒傷團長蘇長春母子六月十四日又竄擾匹馬河八寶樹等處經 臣等批飭元江直隸州他郎通判文武會同督團拏辦於六月二十六暨七月十三等日將匪擊敗殺斃匪黨十餘名查點練丁陣亡五名受傷九名團紳武舉鄧炳煜亦被鎗傷陳定邦因畏官兵仍逃往越南地方未經弋獲後因團練防守日久漸各散歸詎料陳定邦突於十月間糾匪八百餘人復回木受寨住紮焚掠又竄擾匹馬河壩溜渡桃樹坪等村遂有附近羣民相助爲匪團長李榮春等家均被抄毀各團極力堵禦僅殺斃從賊六名而練目李大張得林均被羣匪鎗傷斃命又殺斃練丁四名致各團衆寡不敵而潰十一月初四五等日陳定邦又大股逼攻猛烈街一帶團紳楊宿楨等因賊勢猖獗守禦難支呈請署元江直隸州臬勳承署普洱府分防他郎通判張舒翰轉稟添調大兵剿辦維時探聞黑夷匪已經剿滅 臣等接粵後悉心

商酌以陳定邦黨與漸多深恐日久滋蔓爲害不細莫若卽移剿保黑得勝之兵就近往剿以期迅速殲除當卽檄飭候補副將馬維祺王天祥候補參將張紹模各帶所部操兵共計九營馳往會剿一面照會普洱臨元兩鎮暨檄飭迤南道嚴飭所屬扼要堵剿毋使賊勢蔓延嗣據署普洱鎮總兵楊國發迤南道鄧華熙呈覆該鎮道接據元耶兩屬文武稟報後已飭派候補參將梁士偉調帶駐防思茅土勇一百名普洱鎮左營守備馬成龍帶操兵一營於十一月二十四五等日開拔往剿並飭各屬文武嚴防要隘以杜竄擾又據馬維祺張紹模王天祥等到防後先後稟報該將領等會督元耶兩屬紳孫世泰張世祿等分途進兵攻擊於十二月十六十八等日攻克裸枝山哈吧梁子紐薩渡口等處陣斬賊目張尊黑一名鎗斃從賊三十餘名奪獲旗幟器械多件兵勇受傷八名二十一二十四等日又攻克老謝寨八寶樹木戛寨等處鎗斃賊目二名殺斃十一名兵勇陣亡三名受傷四名賊匪四散逃走官兵連日追捕於十四年正月初二日殺斃從賊白里幅一名擊獲犯母陳楊氏白兆采等男女四十一人陳定邦遂率黨逃入廬糯大箐併力死守該將領等設法購緝招降匪黨楊發昌飭其潛降得從擒獻首犯十三日賊營內忽自相攻殺官兵乘機進擊殺斃賊目三名又鎗斃二名首犯陳定邦亦中鎗傷倒地當被官兵擒獲楊發昌卽帶被脅難民棄戈來投餘匪逃散該將領等因陳定邦傷重垂斃恐被倖逃竄當卽將陳定邦處斬

爲首示衆地方一律肅清等情稟報前來等查土匪陳定邦屢次滋事拒敵官兵實爲罪大惡極雖已
擊獲伏誅尙有其弟陳靖邦在逃未獲自應仍飭該管地方文武員弁認真緝拿務獲懲辦並飭各營將
領將兵勇先行撤回以節餉需所獲之白乳采等已批飭解省審辦應請俟審明後另行辦理至於此次
出力員弁紳團不無微勞容等查明健於剿辦黑夷匪案內擇尤請獎得 旨覽奏均悉卽著將逆
犯陳靖邦嚴拿務獲毋任漏網在事出力員弁准其健案擇尤保獎○丙申祭 關聖帝君廟 上親詣
行禮○李鴻藻等奏鄭工西壩工程擬先就挑水壩做起節節進占於光緒十三年十二月二十日祀土
興工先經奏報在案李鴻藻到工後擬加查核一面嚴催料物一面會飭總辦西壩事宜前山西藩司紹
誠督飭在工文武員弁嚴催兵夫提集捆鑲船隻就堤放埕進鑲如法築做所有該處估幫後役早經完
工一律寬厚堅整足資展布惟河溜緊逼壩前淘刷不已入首埕占卽係深水撐擋下料不易施工雖照
估定占寬十二丈築做而單壩孤懸三面著溜尙虞力薄難支探量壩前水勢已淘深二丈七八尺至三
丈一二尺不等更恐出占難資截頭當於該埕上首後身飭拋磚石埽一段俾壩身有所憑依庶免回溜
後隨之患旬日以來併力工作偏值二十七八九等日風雲交乘飛沙迷目壩頭人難立足不能不稍待
晴霽施工現截至本年正月初五日止做成埕占十六丈一尺均係層土層積逐埕鑲築仍按段加鎮大

土實力跟盤總之進一占卽有一占之益查看溜勢漸向外移事機頗爲順手惟此次口門過寬占數較大加以陰晴靡常卽施工難易不一過求迅速恐致草減偷工而稍涉延緩又恐春汛將臨水長沙鬆溜深費手等惟有趕緊催攬務期以速補避惟是工需糴料一項購辦仍難踴躍近料則搜羅殆盡遠料則限於程途車運情形滯滯統計兩項糴料除動用外實存三千二百餘垛不敷甚鉅現在東場亦經開工兩場次第進占設一時料物不能應手將不免停工待料之虞等焦急萬分莫能名狀又經飭派委員於距工適中之地僱覓車輜添設轉運料廠俾遠來之料得以源源濟運以期迅速仍嚴飭辦料州縣及委員等盡力購辦毋使缺乏冀得早竣工仰紓宸廑得旨覽奏欣悉溜勢外移事機順手著李鴻藻等趁此春汛未至之時嚴督在事員弁加緊進占一面催集料物迅速趕辦務期早日竣工毋得稍涉延緩○丁酉西甯辦事大臣李慎因病奏請開缺允之○戊戌貴薩凌阿副都統銜作爲西甯辦事大臣○諭軍機大臣等英兵於初八日攻燬隆吐兵房藏番自行退去英使來言印督飭約其兵但使藏番不越界出臨彼兵不過隆吐以後一切照舊等語藏番昏愚已極違背約此次辱由自取朝廷早在意中現在卡房既燬若藏兵不再出英兵亦必撤回仍可相安如藏番升泰迅飭藏官勿再執迷不悟爲出界復仇之舉或俟英兵退後又復前往設卡以致引敵深入求如現在情形而不可得則噫膺無及矣除

飭總理衙門促英使電催印督及早撤兵外劉秉璋接奉此旨即飛咨升泰欽遵辦理迅速覆奏○己亥
江西地震○張曜奏鄭州漫口迭奉 諭旨嚴催自必尅期進占堵合之後黃水仍由山東入海所有沿
河兩岸埝壩各工亟應未雨綢繆擇要修辦防汛料物亦當趕緊採辦以免臨時周章上已分飭司道將
十四年防汛經費照章籌解仍令河防局趕購料物認真修辦以期有備無患惟查運庫額撥銀八萬兩
十二年欠解銀四萬兩十三年欠解銀七萬兩實係無款可解不能不設法變通以免缺誤擬請將此項
額定經費改由藩庫籌撥銀六萬兩下餘二萬兩仍歸運庫竭力籌撥下部知之○岑毓英等奏臣毓英
於光緒十一年十月十三日曾將欽奉疊次寄 諭飭令將糜費之款痛加刪節存留各營按日訓練並
將如何裁減及每年所節餉銀若干詳晰具奏等因欽此當經奏請將關邊勇營及練軍綠營一概考驗
裁併挑留精壯補足十成戰兵一萬九千三百五十一名至綠營守兵仍設五成馬兵暫缺以五成戰兵
分布關邊以五成留防內地遇有徵調除酌留操防外仍有勁旅萬人可以隨征惟關邊五成戰兵須編
成營哨其營員哨弁薪水以及雜費年約需銀十餘萬兩比較舊額雖增然較與向年餉費計可節省七
十萬餘兩奉 旨交部覈准在案當將關邊勇營內地練軍擇其年力強壯久經戰陣者共挑得九千六
百六十九名以符雲南通省五成戰兵之數爰派現署雲南提督開化鎮總兵蔡標統帶本標及所轄各

營戰兵駐紮馬白關交趾城橋頭木廠田棚長嶺岡臨元鎮總兵何秀林統帶本標所轄各營戰兵駐紮新安所竊頭水田暨耗新街商舖廠署騰越鎮貴州古州鎮總兵丁槐統帶本標及所轄各營戰兵駐紮迤西之南甸平巖蠻允杉木籠等處地方又分防昭通東川堵禦黑蠻分駐等甸平緣保護餉道此布置新添五城戰兵之情形也上年五月 臣鈞培到任後會商調兵剿辦黑夷匪乘間竊發因內地各營舊設五成戰兵散處營汛不敷調遣祇得添募得力營勇故能早日蕩平惟新添戰兵與舊設戰兵同一支食餉銀及至有事調用得力迥不相同皆由整散之情形既殊內外之訓練互異也 臣等伏思滇省地處極邊控制蠻夷從前設兵至重祇以綠營廢弛日久遂至不能得力咸以同治年間平定全滇轉藉民力現在西南強鄰逼處內姦不時竊發其勢有僭難於往昔者若不趁此邊隅嚴安將武備認真整頓恐一旦有事倉猝無以應變惟是庫款支絀餉既不能再增兵即不能多設 臣等公同商酌擬於舊設五成戰兵內再調出三成仍照練兵章程另設統帶營哨官升水火夫簡練督操以專責成統共八成戰兵一萬五千四百七十九名除分防騰越開化蒙自各邊外其餘即屯紮於大理永昌順寧洱省城並分防緊要營汛通衢道路以期內外周密邊疆一氣仍互相更調輪班換防以均勞逸而示體恤惟沿邊口隘甚多內地戰兵不敷分布且煙瘴要害如河口三猛紅江沿岸各隘卡仍非粵勇不能相宜是以光緒十一

年冬季奏准改勇爲兵後仍請暫留粵勇六千名駐防瘴地並聲明俟勘界通商後再行裁撤
光緒十二年冬間界務定後即擬將此項粵勇裁撤以節餉需嗣據各營哨官弁等稟稱此項粵勇本係
吳亞終黃崇英等總兵劉永福部流落越南將及廿年今若一旦遣撤必至無家可歸後患有不堪言
者請分別暫緩裁撤等情臣等復詳加體察尙屬實情即飭該將領等將打仗勇敢年力強壯者另行挑
出仍食勇餉其久居越南能耐烟瘴攜有家室堪以就近屯墾者編爲土勇現經各將領悉心挑併共編
爲粵勇十三營土勇十五營查前奏留粵勇六千名編爲二十八營每營月支薪餉銀八百零七兩八錢
口糧米九十石零六斗每月共合支薪餉銀二萬八千六百十八兩四錢米二千五百三十六石八斗現
在僅設官勇十三營每月共該支統帶公費督帶公費薪餉銀一萬五百一兩四錢土勇十五營每月應
支薪餉銀五千六百七十兩較前留粵勇二十八營原支之數每月計可節出餉銀六千四百四十七兩
擬將此項銀兩卽作爲續調三成戰兵應設統帶督帶薪水公費暨月操獎賞等項俟戰兵訓練精強後
再將粵勇土勇陸續裁撤以符原案似此一轉移間則增兵而餉項不煩籌畫裁勇而邊備不致空虛庶
於邊防節餉之道兩有裨益下部知之○庚子 上奉 慈禧端佑康頤昭豫莊誠皇太后幸醇親王邸
第視疾○壬寅祭 歷代帝王廟遣魁斌行禮○癸卯諭慶裕等奏查勘 福陵 昭陵應修工程請擇

吉興修一摺著欽天監於本年三四月內選擇吉期先行知照著盛京將軍會同工部侍郎屆期敬謹興修○諭前據劉銘傳奏著恆春營游擊劉全稟控臺灣鎮總兵吳光亮調考軍政有向該員函借索賄等情當將吳光亮撤任交劉銘傳查辦茲據查明復奏吳光亮雖無向劉全索賄免考軍政情事惟以專閫大員輒向屬員函借銀兩究屬不知檢束吳光亮著交部議處劉全帶病過考未能得力經吳光亮稟撤調郡卽以吳光亮索賄免考等情挾嫌妄控此風斷不可長劉全著卽革職永不敘用以示懲儆大品頂戴吳卓勳在該鎮署管帳輒與劉全往來亦屬不安本分著卽勒令回籍不准逗留○乙巳 上諭 奉

先殿 壽皇殿行禮○丙午李鴻藻等奏臣等前於兩壩開工後當將西挑水壩進築壩占丈尺會摺奏報在案連旬以來嚴檄兩壩總辦紹誠潘駿又等督率在工文武員弁加緊進占迅速趕辦不准稍涉延緩現計東壩自開工日起已做成正壩壩占長四十五丈六尺上下邊壩加土壩亦同時分路跟進層土層稍鑲築穩固西壩挑水壩續成壩占連前共得一百三丈二尺測量水勢東壩壩前水深一丈二三尺至一丈七八尺不等西壩上首緊靠大溜水深之處尙有三丈一二尺溜勢亦仍如前察看新築壩工均屬一律堅穩並無淘刷變動情形臣等以節近春分汛期將至正工程喫緊之時迭經親往查催壩頭兵夫人等員捷率芟往來無間未敢稍形鬆懈第以新做工段寬長必須逐坯鑲築實力盤築一氣追壓到

底始得穩可抵操之過急難保無偷減之弊轉恐不足以昭慎重臣等惟有隨時稽察竭力續催庶期工歸實濟惟料一項原估二萬餘垛屢經核減至少亦一萬三千餘垛屢飭各州縣設法購運並在兩壩設廠放價收買兩月以來僅據運到四千餘垛終未能十分踴躍緣民間存料有數愈購愈少價亦愈昂時屆春耕車輻僱覓艱難轉運更形滯滯查兩壩應進占數西壩屬十之六七東壩屬十之三四而東壩應集之料除動用外現存二千一百餘垛尙不至遽行短絀西壩除動用外止存一千四百餘垛爲數無多不敷甚鉅設一時不得應手將不免停工待料之虞且工段太長以時日計之亦恐趕辦不及臣等焦勞萬分徬徨無措現經札飭紹誠等詳加籌度如有可以變通成法之處另由臣等會同妥商具奏得旨覽奏均悉桃汛將至工程喫緊該尙書等務當多方設法趕催料物以資應用如能變通成法併工節料卽著會商速奏○李鴻章奏准戶部咨議奏籌備河工賑需一摺光緒十三年九月二十日奉 旨裁撤長夫暨鹽商捐輸當商匯號交銀三條著照所請行等因欽此知照前來除長夫遵照酌裁鹽商勒令捐輸業經奏報在案並將匯號交銀一節另行核辦外所有當商預行交課一條遵飭司道督同府廳州縣查明每州縣當鋪若干座每年例交稅銀若干勸令遵照部議預交二十年課銀不准吏役藉端需索旋據各地方官稟報直省當鋪本小利微又值頻年災歉迭次減惠商力拮据且有將次歇業之商預

交不易臣復批飭認真諭勸一律交足其有二十年期內歇業者准將接開之新商應交課銀抵還舊商預交之項俟扣足二十年後再由新商交官以昭平允茲據藩司松椿詳稱各屬均已遵辦飭由各州縣給予收照註明所交銀數及准抵年分內大興宛平兩縣預完課銀由該兩縣徑解部庫兌收毋庸由司收解應即剔除又良鄉房山涿州三州縣尚未詳覆現照司案光緒十二年當稅奏銷座數先行開報仍飭迅速查明詳覆如有參差再請咨部更正茲查明順天永平保定河間天津正定順德廣平大名宣化十府屬遵化易州冀州趙州深州定州六州屬實在開設當舖五百三十座每年每座例定課銀五兩均令預完二十年自光緒十四年起至三十三年止每座應預交銀一百兩共應交銀五萬三千兩此二十年限內概毋庸交課現計已解司庫銀三萬三千八百五十餘兩尚未解銀一萬九千一百四十餘兩業經分飭趕緊解清應道具清冊詳請覆奏再各屬州報當舖座數有少於司案光緒十二年奏銷者查係各該州縣已經詳報歇業之商因止當候贖年限未滿未能繳帖是以司案尚未造報開除以致數目間有不符並無別項情弊等情臣覆核無異除飭將銀兩勒限催齊彙存司庫聽候部撥並將清冊咨部外理合恭摺覆陳下戶部知之○丁未允譚鍾麟回籍調理○調楊昌溶為陝甘總督以卞寶第為浙閩總督王文韶為湖南巡撫○電 諭劉銘傳本日據總理各國事務衙門奏臺灣設局抽收洋商盤金與約

不符請行遵辦一摺臺灣爲通商口岸洋商應完出口正稅向不抽釐既據該使臣等屢次據約陳請著劉銘傳將抽收洋商釐金一事卽行停止至該省應如何徵收落地稅釐著另行設法辦理總應徵之華商彼自無所藉口○諭軍機大臣等本日據總理各國事務衙門奏廣東法領事署派兵保護勿庸更換練勇一摺又聞鈔呈張之洞二十二日電信一件法領事鋸樹毆弁一案事本細微經吳大澂致信排解一切照舊卽係已了之事乃張之洞並未知照總署忽於數月之後奏請飭令該衙門向法使理論殊屬非是此項弁兵派撥有年自上年四月後循習不改亦相安無事乃該督此次電信猶謂體制所繫士氣所關措詞亦屬過當況既有該撫信函彼既執爲確據豈能以並無公牘與之強辨耶總之此等細故外省督撫隨宜商辦得結卽結若已有定議尤應卽時知照總署使內外辦理不致兩歧方爲和衷共濟之道此事經吳大澂排解完結並無不合亦斷難再改張之洞所請切商該使設法了事之處著無庸議○總理海軍事務衙門奏英德承造戰船來華擬明年編立海軍第一枝欽奉 慈禧端佑康頤昭豫莊誠皇太后懿旨如所議行○諭福奏熱河土槽子過山綫兩處銀礦自咸豐三年八月暨十一年正月經前任都統毓書春佑先後奏准開採土槽子定章由都統派員督徵課銀按月呈交都統衙門存儲過山綫定章由熱河道派員徵收課銀按月解交熱河道庫存儲均係候部撥用歷年遵照辦理近年各礦銀苗

不旺徵課亦減前因商人李文耀賠累私自回籍措資不返經保充之直隸候補道朱其詔稟請勒限催追由奴才於十二年十二月附片奏明嗣因限滿未回經直隸督臣李鴻章僱來外洋礦師卽飭該道朱其詔帶往各礦查勘當經咨會據該道朱其詔具稟各礦鉛多銀少土法不能取鉛因而賠累所出青鉛可令製造鎗礮彈子及配鑄制錢之用惟須參用西法另購鎔鉛爐方能鉛銀並取舊礦積水深至百尺非起乾不能細視現擬就近將平泉礦中起水鍋爐機器運往起水一面仍用土法擇淺處之沙綫逐日開採以顧國課一俟水乾由該礦師勘明估定成本再行妥議章程奏明辦理商人李文耀既限滿未回應由該道朱其詔兼辦釐清界限自光緒十三年四月初一日起兩礦工作及按月應完國課並委員薪水由朱其詔籌辦其是年三月底以前公私欠款歸李文耀承認所有兩山之督辦徵收委員悉由該道朱其詔會商熱河道暨理刑司揀員札派等情咨會嗣因該道朱其詔久不到礦國課懸虛節次咨催冀得確實以憑奏報茲於本年二月初十日據該道朱其詔來見面稟情詞與咨文相符並將兩礦課銀自光緒十三年四月起至十二月止按月補解前來奴才查礦務爲當務之急課銀亦 國帑攸關既准直隸督臣咨明礦師查勘各礦鉛銀並有卽飭該道朱其詔起水詳驗仍用土法取辦兼顧國課兩有所裨奴才近在熱河自應會督辦理所有兩礦課銀自光緒十三年四月起歸該道朱其詔按月呈繳之處應

請旨飭部立案如有拖欠卽向該道追賠以免推諉至該道朱其詔承辦兩山礦務究竟能否成效統俟水乾勘估沙纔厚淺能否敷本查明另行會同直隸督臣商核奏辦下部知之○己酉予故詹事府右中允追贈內閣學士沈炳垣於浙江海鹽縣本籍建祠○以奎潤著鎮黃旗蒙古都統麟書署正白旗漢軍都統○以松淮清安署正藍旗滿洲副都統○諭倪文蔚奏查舉賢吏請旨嘉勉開單呈覽一摺河南開封府知府孫雲錦陳州府知府吳重熹南陽府知府汲文選署河內縣事祥符縣知縣袁鎮南睢州知州王枚署安陽縣事惠縣知縣鄒紹言據倪文蔚臚列各該員操守政績均有可觀著該撫飭令該員等益矢慎勤始終奮勉以副朝廷孜孜求才至意○辛亥倪文蔚奏豫省市面向本平淡制錢無多自上年八月間鄆汎黃河漫決工賑並興公私需錢甚夥市中頓形闕乏而奸商又復乘便居奇以致錢價日長銀價日低若不設法劑平不惟小民之生計彌艱而工賑帑銀定必因而暗耗臣當督同司道傳訪周諮擬仿乾隆初年及咸豐年間京師開設官局成法採取陝省現行章程在工賑內提銀十萬兩以爲官本於光緒十三年十一月內在省開設豫立官錢局揀員經理雖屬官事仍用商規祇期市價之平不爲罔利之計且定限於鄭工告竣之日卽行裁撤用昭大信開辦數月商民均稱其便圖法頓形流通錢價亦無大落而工賑發款尤可藉杜耗折之虞茲據該司道等詳請奏咨立案前來除咨部外相應附片具陳

下戶部知之○誠福奏前准直隸督臣李鴻章咨會候補道朱其詔承辦土槽子過山綫兩處銀礦機器
內應用煤鐵卽於該礦左近擇煤鐵礦之合用者由該道派撥工匠採取供用等因當經轉飭知照茲據
承德府知府廷杰詳准辦理礦務候補道朱其詔移知府屬興隆山榆樹溝等處煤鐵各礦欲往開採備
用等情詳經札飭熱河道德克精額委員查勘興隆山距郡甚近於東陵後路風水有所關礙榆樹溝
距郡較遠雖無關礙各處風水但窮鄉僻壤易招匪類恐致貽害地方等情繪圖貼說由熱河道德克
精額詳送核辦前來奴才查興隆山既經查明關礙東陵風水自應禁止不准開挖其榆樹溝煤窖雖
據稟稱窮鄉僻壤易招匪類但實成地方官認真稽查未始不可准行惟此處煤窖不在道光九年前任
都統成格奏奉 上諭准其開採之列第現在礦務緊要需用機器非煤火不能運動若不變通辦理殊
恐有礙礦務可否准其開採之處相應請 旨飭部核議以便遵辦下部議奏○是月廓爾喀來貢
三月壬子朔張之洞奏廣西水道自桂林至梧州名曰廣江會離樂恭荔諸水灘險口多最爲舟楫之患
前明萬歷年間廣西巡撫蔡應科設法疏鑿數年之久未能盡平嗣後官商人等雖亦隨時修治獲效甚
難臣前查悉西省總路廢壞灘瀾險絕光緒十二年內籌款項並江蘇協賑紳士嚴作霖等捐項會同
總理廣西撫臣李秉衡飭委總兵馬進祥桂林府同知趙慶蕃永福縣知縣任玉森等將平樂昭平一帶

山路先行修理當將辦情形奏明在案嗣該員等因尚有餘款復將平樂至省幹路一併接修完善並鑄鑿險灘五處惟各灘僅能略去水面亂石其水底石根堅牢奔湍漩湫非炸鑿所能施因復派委知縣陳瀛藻縣丞張煥斗攜帶機器炸藥以電綫轟發凡有險要處石連根炸碎自光緒十三年二月起至四月漲發暫停計開將軍灘木碌秀才灘三門柳木龍口險窖上下仰威鎮鎮箕象棋黃牛小背等灘一十有四迨至十月仍飭該委員等復行開辦維時冬乾水涸險石盡出除前開各灘擇險再加轟除外至年底工竣另又開下古橋上古橋耙灘木夾鎖題強灘面灘小神唐調馬灘下延字金雞大龍大結廖家橫灘黑山脚韭菜龍嶺五大連假險窖灘二十有一此外各灘尚平毋須再事轟炸綜計兩次由黃梧以迄陽朔約七百餘里共開險灘三十五處商民往來莫不稱便據該委員等繪具圖說稟報前來臣伏查桂林府廣江灘石林立有礙舟行向為商旅之患此次旋用炸藥化險為平從此利涉同占似於商情民命均有裨益報聞○乙卯雨○諭陳赫奏衛守備短交銀兩逾限未完請旨拿問監追查抄一摺已革安徽安慶衛守備調補浙江杭州衛守備武壽齡前在安徽衛任內短交徵存各項銀兩為數甚鉅除已交外尚短交銀二千九百三十餘兩迭經勒追清繳迄未完解實屬玩延武壽齡著即拿問監追提集經手家丁書役人等嚴訊是便是挪分別辦理著直隸總督將該革衛守備家產嚴密查抄備抵一面查明歷

過任所寓所有無資財寄頓一律查抄以重庫款○戶部奏山西省歷年奏報釐稅案內均列有未完銀兩經臣部於覈撥光緒九十兩年釐稅案內議令將未完各員迅即勒限完繳倘逾限不完或完不足數即從嚴參辦並令嗣後不得再有未完名目奏准行令遵照在案今該撫奏報光緒十一十二兩年釐稅案內仍列有未完名目雖據聲稱勒限完繳究屬有違奏章查釐稅兩宗商賈接則隨時輸納斷無帶欠之理其造報未完皆係委員侵吞捏飾該省徵收釐稅原有一成經費嗣後議准收數在十八萬兩以上另提銀一萬兩辦公已屬有餘況釐稅原無定額徵收多寡一任開報貪狡之輩舞弊營私平日朘削商民侵漁正項巧為彌縫者不知凡幾迨至無可彌縫公然以業經報收之款復肆侵挪巧立名目列為未完大吏漫不加察即據此登諸奏牘並不從嚴參辦問或奏參勒追一經完繳即行開復於彼毫無所損查州縣虧短錢糧參後續完例准隨案開復緣州縣辦理地方一切事宜偶有例外之事挪用或屬有因至徵收釐稅各員既無地方之責又無供億之煩捏飾侵吞情尤可惡若參後續完准予隨案開復似不足以懲貪婪而儆效尤臣等公同商酌擬請飭下山西巡撫嗣後該省徵收釐稅務當嚴定比較隨時稽察毋任徵多報少捏完作欠倘再查有捏報未完情事無論數之多寡即將該員照侵欺錢糧例奏參革職勒追即參後全完不得隨案奏請開復倘抗不呈繳或繳不足數即行拿問照例治罪庶祛積弊如

蒙 俞允俟奉 諭旨後卽由臣部知照吏部並通行各省一體查照辦理得 旨如所議行○丙辰暮
星見東南方○予故前江南淮揚道郭沛霖於安徽定遠縣建祠○己未予故寧夏將軍維慶祭葬○以
鍾泰爲寧夏將軍○壬戌盛京戶部侍郎啟秀因病乞休允之○癸亥江蘇地震○調綿宜爲盛京戶部
侍郎崇禮爲兵部右侍郎以恩榮爲理藩院左侍郎○李鴻藻等奏 臣等前以趕辦大工料少時促酌擬
變通辦法爲併工節料之計於二月二十六日會摺奏報在案挑汛屆臨水勢日旺卽據兩壩總辦稟稱
東壩進占卽係頂溜深水撐擋下料人力倍艱復遇連日大風溜勢側注壩前立見搜淘水深至三丈有
餘新進第九占陡形蟄矮隨卽添運土料一氣抬鑲始臻穩固西挑壩進至二十占接近大河邊溜緊靠
壩前深至三丈三四尺二十三日狂風鼓浪河勢遂節裏圈挑壩全行著溜情形喫重幸於該壩上
首預飭鑲做護壩尙不致有搜根之患究因風浪過大新進二十一占隨鑲隨蟄不得已懸賞鼓勵兵夫
於風沙迷目之中併力跟鑲追壓幸保無虞連日天氣尙晴人夫照常工作計自二月初九日起截至二
十五日止東正壩又續得二十六丈四尺連前共做成七十二丈西挑壩亦續得四十六丈七尺連前共
做成一百五十丈邊靖土壩同時分路跟進一律盤壓堅整惟此後汛水日長水力漸強鑲壩進占一切
情形費手 臣等惟有竭力催鑲計日程功務於迅速之中倍加慎重固不敢因循而誤事亦不敢草率以

圖功總期進一占卽得一占之益仍一面嚴飭辦料各員多方設法購收以廣招徠而資工用至估挑引河工程原估長二千丈寬八十丈續經攷勘改爲長二千五百丈寬六十丈劃分九十段按上下兩截挑挖先從下截五十一段挑起以下計四十段自上年十一月十六日興工至本年二月二十日止各段紛紛報竣以出土之多寔定委員之功過賞罰從嚴人心思奮據總理官先行查勘尙無墊崖貼坡偷改丈尺情弊現飭接挑上截五十段同溝繞等工分別劃派仍留引河頭三十丈歸於臨時抬挑其餘各段並飭勒限挑挖於壩工前一律呈報完竣屆時再由臣等親往驗收以昭核實報聞○甲子雨○古尼音布以病免以長善爲杭州將軍○衛榮光奏准吏部咨會議浙江巡撫劉秉璋等奏請將永康縣縣丞改爲永仙分防縣丞金華協中軍都司改爲巡防都司移設八保山等因一摺於光緒十一年十一月十九日具奏奉 旨依議欽此黏鈔原奏內開將原駐改駐地方情形詳細繪圖貼說並造具改駐分別管轄節制各員弁營制銜名清冊一併隨摺送部以憑查核復奏到日再行核辦所有分防建置一切事宜應令該撫等另行籌議辦理等因行文到浙當經轉飭遵辦去後茲據布政使許應鑾按察使蕭韶曾詳據金華府知府陳文驤稟稱親至八保山相度山川采風問俗其地爲永康縣管轄距縣治二百二十餘里民貧而悍又與仙居縣壤地錯雜以致匪蹤據爲淵藪良民被害難以呼訴現在分定地面會同台州府知

府成邦幹確查妥議應以永康四十六七都仙居二十三都地方歸縣丞專管遇有疏防盜案承緝不力處分卽將縣丞開參其都司改駐營制又與金華協副將蕭升農會議請將金華協中軍都司改駐八保山爲巡防都司並將右營永康汛千總夾溪汛千總東陽縣城守汛把總夾溪白峯兩外委歸該都司管理該都司仍歸金華協節制毋庸更易營名並照撫標參將之例金華協不再另設中軍左右兩營公牘悉由兩營守備徑達副將核辦至左營守備原爲都司中軍守備今相去較遠卽刪去中軍字樣其撥歸都司節制之五汛本係右營汛地遇有大股台匪由都司就近調遣平時操防巡緝公文上下等事仍歸右營管理承緝開參之案亦仍照原制毋庸另議都司所駐八保山之桂川莊其山表延永康縣四十六七都應卽定爲都司專管地面其仙居二十三都仍以仙居潘灘汛外委爲專汛各營各地不必更張都司所帶兵丁四十名如過開補均由都司自主仍申報副將查核錢糧兵米概由副將札發無須再由守備管理以歸簡易並聲明縣丞衙門額設門子一名皂隸四名馬夫一名今改駐八保山以重事煩不敷差遣擬就永康仙居兩縣各撥壯役二名共壯役四名每年給工食銀六兩各移各縣給領都司衙門應給稿書一名清書一名亦在該營額設數內撥給建造縣丞都司衙署經費由外籌辦不動正款所建基地由縣查明畝分另請豁糧除額等情由司核明具詳前來臣查永康縣八保山地方界於金台兩

郡之間山深林密最易藏奸建置事宜分定地面扼要撫馭爲第一關鍵既經金華府知府陳文驤親詣
履勘並與台州府金華協一再會議應請卽以永康縣四十六七都仙居縣二十三四都撥歸移設之縣
丞管理以永康縣四十六七都爲都司專管地面以專責成遇有疏防盜案分別照例開參金華協本無
中軍同治八年始將左營都司改爲中軍都司現因該都司移設八保山離郡較遠擬請裁去中軍名目
左營守備亦刪去都司中軍字樣撥歸都司節制之永康等五汛操防開參各仍舊制事歸簡便免涉紛
更均應照辦其添撥壯役書識既不另請開銷建署所需經費亦不動支正項將來諮除糧額應由縣查
明科則畝數另行專案詳辦以昭核實下部議奏○乙丑閏敬銘因病奏請開缺不允予假兩月調理○曾
以紹祺爲正藍旗蒙古都統○戊辰閏敬銘奏懇恩收回賞假成命仍准開缺不允予假兩月調理○曾
國荃奏金陵洋火藥局常年經費並添礮加造酌增經費以及逢閏加工經臣隨時奏明並經聲明留存
新礮四付如須一併開造以及添購機器修造廩屋一切應增經費容俟隨時酌定報明以昭核實迭經
欽奉 諭旨允准在案茲據金陵製造洋火藥局江蘇候補道章珩等詳稱該局自光緒十年夏間廠工
告竣開造火藥煎提硝磺煅煉柳炭逐日配製所有鍋爐汽管等件時受火力本易損壞而皮帶梭纖飛
輪鼓運各廩屋上下震動日久致多損裂此外庫棧局屋羣房圍牆又皆累年未加修葺引河駁岸等處

經水衝刷亦未疏濬挑築在在均難緩辦必須添修購換擇要興修計添備鍋爐汽管等件約需銀二千餘兩修廠屋引河駁岸一切應用工料約需銀四千餘兩統計需銀七千數百兩擬仍照案由金陵防營支應局撥給應用詳請奏咨前來臣查該局額撥經費係專供造藥支用之款其廠修等項銀兩本經聲明隨時酌定報明以昭核實並據詳稱添備修理各項統計約需銀七千數百兩經臣復加勘覈委係撙節無浮自應准其照案動辦以保機器而重廠地下部知之○已已與葡國互換條約○庚午諭前據劉錦棠錫綸奏參貪劣不法各員當經降旨將知府游春澤等先行革職並諭令將該革員等貪劣各節澈底嚴查懲辦茲據查明情節分別定擬具奏已革知府游春澤已革直隸州知州李永祜前在伊犁軍營充當營後局員浮開捏報照部咨核計已不下二十七萬餘兩之多此外尚有虧欠漏列各員之款所犯情節洵重游春澤李永祜應得罪名著刑部定擬具奏並著兩江四川雲貴各總督貴州巡撫將該革員原籍及寄寓地方財產嚴密查抄充抵並償還虧欠漏列各員款項已革參將周元慶有恃勢婪索確據著發往軍臺充當苦差不准納贖已革都司李占魁有貪婪嫁禍之案著飭將坎吉巴易欠價繳清後發往軍臺充當苦差已革都司萬銘營利肥私著永不敘用遞解回籍交地方官嚴加管束已革協領和陳泰尙無朋比侵蝕確據已革直隸州知州許文失察情弊致潰勇得以藉口該二員業經革職均著毋庸

擬議已革佐領貴慶查無招搖情事著仍留伊犁軍營効力已革道員王龔海查無紊亂餉章封殖情弊惟於營勇變亂時未能切實開導著開復原參處分賞還花翎勇號以同知降補已革主簿周炳南前控李永祐尙無不合著註銷原參處分並開復原官另片奏請將前參各員開復等語已革知府吳炳鑫原參各節既係游春澤捏辦朦朧稟實無虧款已革協領恩祥亦無抗延情事吳炳鑫著註銷原參監追之案與恩祥均著開復原官銜翎○癸酉 慈禧端佑康頤昭豫莊誠皇太后履選秀女○以萬國本爲福建臺灣鎮總兵○錫綸奏伊犁自兵變後將軍及文武員弁衙署悉就頽廢請以次籌款興修下所司知之○甲戌 上詣 奉先殿 壽皇殿行禮○戶部奏查戶部歲入之款惟各省京餉八百萬兩各省漕折一百餘萬兩爲待支正項此外邊防經費二百萬籌邊軍餉二百萬加放俸餉一百餘萬皆有專款支銷不在正項待支之內至四成洋稅及六分扣平均係奏明另款存儲以備要用此部庫入款之大略也從前各省報解足額出入僅可相抵近一二年各省因籌辦海防購買船礮勻還洋款往往截留京餉每年解部者不過十之六七而部中用款又倍增於前除恭備 大婚典禮四百萬添撥銀一百萬戶部業已備有專款不與尋常度支並論此外籌撥鄭州大工六百萬兩山東河工二百萬兩續撥山東河工八十萬兩制錢工本九十餘萬兩銅本五十萬兩直隸工巡船購費數十萬兩皆係提撥截留部庫之款

將歷年銖積寸累之餘罄於數月此部庫出款之大略也現在部庫存款截至三月半止統計銀五百四十萬兩其中漕折一百十萬兩係專備開放俸甲米折之用邊防經費二百三十八萬兩係專備開放東三省防軍之用其另款存儲可以挪用者只四成洋稅一百二十三萬兩而已現在正額專款已經告罄而各省應解本年京餉大抵皆在上忙開征之後部中上半年放款竟支絀萬分現擬暫顧目前之窘擬先將四成洋稅一百二十三萬兩提歸正項以備開放月餉之需此外可以提用者尙有加征洋藥釐金一項查洋藥釐金原係上年工部奏准專歸部庫留爲彌補庫儲之用今查此款自上年正月開辦起至十一月第一百九結止除各省留支及海防撥用外尙餘剩銀一百萬兩上下擬飛催各省儘數提解部庫以備度支得 旨如所議行○乙亥子故科爾沁忠親王僧格林沁於奉天省城建祠○丙子召江西布政使李嘉樂陝西布政使李用清來京○戊寅倪文蔚奏鄭州大工需用稍料節經分派委員會同產料各州縣確查境內存料勒限購運現當進占喫緊之時尤在印委各員實力辦運方足以資接濟茲查有候補知縣王義銓派委赴禹州會同地方辦料久逾限期辦無成數率行請費投廠訪聞該員以現定禹州購料價值私赴近工處所收買以致西鄉官廠一帶料戶觀望不前實屬居心狡猾貽誤要工候補知縣魯鳳基知府用候補直隸州榮澤縣知縣連魁會辦榮澤購料連魁先經運工七十垛魯鳳基到縣

復據報稱可以續辦三十垛該縣距工較近又係沿河產料之區採辦百垛爲數本少乃續據會稟但報存數十萬四千餘束核計不足四垛嚴批飭查延玩不獲並故違定章自行堆垛冀得暗增虛數多領料價浮加運費均屬任意取巧據鄭工總局司道總辦稽料道員歐陽霖先後稟報前來未便稍事姑容致各州縣皆存意懈弛集料愈難除將王義銓撤回嚴飭魯鳳基連魁將續報稽料三十垛克日運足再行認真採購外相應請 旨將候補知縣王義銓卽行革職候補知縣魯鳳基榮澤縣知縣連魁均暫行革職以觀後效如仍不知愧奮玩誤工需再當從嚴參辦得 旨王義銓著卽行革職魯鳳基連魁均暫行革職○倪文蔚奏此次鄒州大工時日迫促工程浩大自去年節次欽奉 諭旨會籌堵合卽深思所以速運料而便施工者近燭沙澥取土爲速一難也日計不足必兼夜工燈燭之光不能及遠二難也水集下游州縣稽料由周家口水路運工以輔陸運之不及逆流上駛牽挽無路三難也於是議購西洋鐵路土車以速運土議購電燈以備夜工議用小輪船溯江入淮拖帶料船以速運料當經先後電商北洋大臣李鴻章飭由江海關道龔照璣等定購小鐵路五里連運土鐵車一百輛電燈一架淺水小輪船二隻現在鐵路電燈均已運至西壩安設運土迅速較土夫推送難易不啻倍蓰電燈照耀不殊白日可以晝夜施工惟淮泗等河經黃流奔注溜勢無定深淺不常試行小輪時慮阻攔現今多集民船輔運

轉運所有定購淡水小輪船二隻擬仍交興照現代爲變價除飭鄭工總局將各項價值運費分別查明開報再行咨部備核外謹會同督辦鄭工總局飭書臣李鴻藻署河東河道總督李鶴年附片奏陳下部知之○已卯李鴻章奏新購致遠靖遠經遠來遠四快船於上年十月杪駛抵廈門業飭統領水師提督丁汝昌前往會同洋員琅維理驗收卽在該處過冬北洋解到以後該四船歸隊操巡現由旅順調至大沽口下應親往察驗船身噸位及機器馬力等項駛行里數以重利器擬將諸務略爲部署卽率同水陸營務處津海關道周馥等出海驗駛並順赴奉天之旅順口大連灣山東之威海衛各防所查看船塢礮臺工程形勢與將領籌布一切所有津署日行事件暫委長蘆運司賀良楨代行代印其緊要者仍封送臣行次核辦報聞○李鴻章奏欽奉光緒十三年正月二十七日 諭旨規復制錢必須廣鑄鼓鑄著李鴻章先行購置機器一分就天津機器局趕緊鼓鑄運津備用等因欽此遵飭天津機器局前福建藩司沈保靖等擇要定購格林活鐵廠鑄錢機器一分凡可就局中廠屋器具歸併勻用者概不購買俾從節省議明英金五千三百八十三磅合中國銀二萬二千餘兩水脚保險在外先由該局暫行挪款墊付半價俟機器運到連後半價核明若干一併奏請撥給經臣於上年四月十二日覆奏並以機器由外洋造成運到需時應先用土法鼓鑄制錢解京濟急等因奉 硃批著照所請戶部知道欽此轉行遵辦在案

茲據沈保靖等呈稱此項鑄錢機器現已到津點收又續經添購錢模連外洋至上海水腳保險費共合英金六千二百二十二磅十喜林八本士加以上海棧租上下搬力起重費並運津水腳共折合庫平銀二萬七千八百七十二兩九錢二分四釐五毫請奏撥款項分別歸墊等情前來臣查前用土法鼓鑄解京制錢工本已奉 旨准於長蘆鹽課應解京餉內截用此次購辦鑄錢機器應需價腳等項事同一律將來開鑄制錢恪遵 諭旨專行運京應用此外尙有建造廠房鍋爐及安置機器工程擬懇 天恩俯准現撥給銀三萬兩仍在長蘆鹽課應解本年京餉內就近截留以濟要需俟廠房各工完竣核明實用確數不敷若干另行奏撥得 旨如所請行○庚辰以熊韶為江西布政使陶模為陝西布政使○以周馥為直隸按察使王之春為浙江按察使○諭給事中倭父奏編譯外班升用班次請飭核議一摺著吏部議奏○辛巳 成貴妃薨

東華續錄

光緒八十九

臣朱壽朋敬編

臣潘鴻鼎恭校

夏四月壬午朔時享 太廟 上親詣行禮○癸未諭閣敬銘奏疆臣劾去大員行圖自便一摺據稱江西布政使李嘉樂署陝西布政使李用清爲近時藩司之最現今諭令來京另候簡用或係德馨葉伯英年終密考淆亂黑白顛倒是非等語各省司道府等官能否稱職向由該督撫於年終出具密考以酌量黜陟其有治績平常或人地不宜者藩臬大員特飭來京候簡原冀掩其未著之愆更策將來之効正朝廷有過之深心卽如此次李嘉樂經曾國荃奏稱再加寬容正大化其偏急方爲有用之材德馨奏稱性情喜刻辦事偏執難膺重任李用清經譚鍾麟奏稱性情堅僻用人行政固執成見與同寅未能和衷以致官民交誼上下情睽於此地不甚相宜葉伯英奏稱性情偏急遇事諸多操切必須隨時訓迪方免貽誤各等語是該藩司等考語督撫所奏大略相同封疆大吏係朝廷特簡凡用人行政必須假以事權方資治理至考察屬吏耳目最近聞見非虛若督撫兩人密考不謀而合必出公論閣敬銘一偏之見一似經其保薦不進不止他人遂不得更置一詞若此風何可長耶況用舍大權操之自上一切舉措亦不盡

以督撫之言爲憑閭閻散銘曾在軍機當差豈不知悉何此奏私心揣測竟專指爲德馨葉伯英二人之密
考九屬非是原摺著擲還○剛毅奏土默特達拉特兩旗互爭界址蒙 欽派察哈爾都統紹祺前往查
辦當經勘明酌議奏請自現流黃河以北乾溝以南按照里數以迤北大成之地歸土默特迤南四成歸
達拉特並請將斷歸土默特六成地畝徵租練兵將押荒銀兩作爲購置馬匹軍械之需奉 旨交綏遠
城將軍妥籌辦理當經綏遠城將軍臣克蒙額欽遵勘明里數分段繪圖覆奏聲明押荒升科事宜交地
方官辦理經戶部咨行到 臣令照豐鎮寧遠廳官荒放地成案奏報核辦當經飭司派員查照直隸開墾
馬廠章程酌議勘丈去後旋據原派委員薩拉齊同知徐林等稟稱此項地畝濱臨黃河逼近山麓夏秋
雨潦盛漲水匯沙積地多瘠薄向來民間承種易地而耕種則出租不種停租地方遠邇豐寧若照直隸
章程每頃出押荒銀二十兩每畝徵租一分四釐每正銀一兩加耗羨銀五分遇閏每兩加增三分辦理
恐多窒礙請將押租兩項分別等則酌量核減已墾成熟之地當年升科未墾地畝定限啟徵丈放地畝
擬由該廳先給印照俟請部照到日發交更換等情請示前來 臣與將軍臣往返咨商酌量定議查前項
地畝本與豐寧牧廠肥瘠不同若必責以將租押銀兩悉照一律必致各佃戶裹足不前遂量爲核減分
別三等上等等定每頃交押荒十兩中等者九兩下等者八兩租銀則上等等中等每畝均交銀一分四釐下

等減一釐耗銀過閘照章核收以示區別其已墾地畝卽以光緒十三年爲始一律升科未墾之地三年後自光緒十六年再行啟徵丈放時先給印據後換部照兼以此項地畝向由蒙古租佃種別出租不種則停現既改收官租必須按畝按年依限完納民情不免疑阻准其水旱偏災隨時呈報勘驗照例分別蠲緩卽水衝沙壓亦准報豁以期踴躍俾易辦理飭司轉飭徐林等遵照卽設局添派正佐各員前往會同丈放茲據布政使張照轉據押荒局委員徐林等詳稱前奉文設局辦理土默特六成招墾事宜遵於三月間局正佐各員到差隨卽會同按照庫儲部頒鐵尺二百四十步爲一畝分段丈量內除蒙古招墾墳墓民人牛牧房屋河渠道路沙灘棚林以及潑荒地一千四百頃又河西界內東南北三面河坍四十餘里計地畝五百三十餘頃實計已墾上地三百四十三頃九十五畝二分中地五百一十四頃四十六畝六分下地一千八十三頃七十五畝五分未墾上地一千九頃中地二百四十六畝九十七畝下地八百頃一十二畝五分統已未墾各色地三千八頃二十六畝六分均已一律丈放先給薩拉齊廳印照先租後押已墾各地現年卽行徵租照章加耗過閘加增十三年共應徵租銀二千八百十九兩五錢一分七釐零於九月間如數徵足批解綏遠城將軍飭發糧餉廳庫收儲未墾各色地畝無閘每年應徵銀一千四百八十三兩一錢四分六釐零應自十三年爲始三年後再行啟徵共應收押荒銀二萬五千五

百五十三兩四錢六分六釐截至十月底已徵起一萬二千二十五兩下餘銀兩趕緊催收並將四圍界址口碑妥為妥當一俟押荒收齊卽行撤局至撥荒地畝屢勘實無可收容再設法募佃如能續墾若干當卽具報以免荒廢所需委員薪水以及局用雜費等項卽在押荒項下核實支用事竣造報惟查此項地畝兩旗希圖利益互相爭奪幾乎無年不釀械鬪之案致令良弱農民知地有瓜分視為畏途不敢租佃羣民則糾合黨類視兩旗之弱強為左右袒唆成鷸蚌之持坐享漁人之利且民不土著不肯盡力耕耨地多荒蕪兩旗實收地租仍屬無幾徒滋訟致成地方之大累現在分清界限丈明畝數歸作官地招佃徵租地色既有區別歲租亦分等差從此永遠為業各守各界兩造無所覬覦旗兵藉資利濟於國計民生均有裨益惟地界邊陲兼以沙漠之中民多愚蠢創辦尤多為難在事各員於沙磧烈日之中冰雪風霜之地往來奔走彈壓指揮亦皆潔已奉公竭誠開導用能感知愚頑懾服刁健剋期竣功民蒙安謐泊屬著有微勞查上年豐寧辦理官荒各員援照直隸張獨多押荒成案業經詳請奏沐恩施此次事同一律自應援照准予獎勵以昭激勸等情詳請具奏前來臣查土默特六成地畝周圍百餘里地至數千頃丈量徵租押荒事屬創始頗費周折承辦各員徐林等竟於數月之內一律辦有頭緒其勞洵為足錄合無仰懇 天恩俯准援案擇尤保獎以酬勞勲等因 旨著准其擇尤保獎毋許冒濫○乙酉常

尋大祀 天於 關丘 上親詣行禮○丙戌西安將軍吉和以病免○額爾慶額奏塔爾巴哈臺非有重兵鎮守不足以固藩籬查前任參贊大臣春滿任內奏定章程以漢隊二千旗隊一千扼要駐紮本無庸驟議更張致滋紛擾惟漢隊皆從關內招募而來久役思歸不安本分者十居八九奴才此次遣撤各營勇丁所遺缺額原議派員入關招募添補成軍業經另摺奏明在案現當黃河決口籌工艱賑需款孔殷屢接部咨諄諄以撙節為務奴才值此艱何敢稍拘成見前議募勇補額亦屬萬不得已之舉以現在情形而論餉薄則無人應募餉厚則用費不支將來遣散又需鉅款終非經久之道刻下欲圖節省除改坐糧土勇兩項外別無良法而營勇驕惰成風一議減餉改章則怨言流布若強改而行轉多窒礙不得不更作他圖伏查塔爾巴哈臺舊制原有換防制兵一千名伊犁換防兵一千名本處額爾特各部落旗兵一千六百名自新額爾後屢有變更未為畫一奴才再四籌思惟有將漢隊概行裁撤規復綠營舊制擬請就近由甘肅各鎮抽調精壯兵丁一千名伊犁現亦無兵可調擬將塔爾巴哈臺索倫錫伯旗隊作為駐防並在額爾特察哈爾各部落內共挑選精壯蒙兵一千六百名合之現在旗隊一千名仍符三千六百名舊額遴派得力將弁分起管帶認真訓練二三年後即成勁旅該制兵等既有身家自無他患第所食錢糧似應比關內稍優以示區別按每馬兵一名月給銀四兩每步兵一名月給銀三兩守

兵一名月給銀二兩旗隊則每馬兵一名月給銀四兩步兵一名月給銀二兩所有綠營官弁現在屯防副將所轄共三十五員自必再行添設通計官兵等廉俸心紅馬乾及辦公津貼添製軍裝器械等項約共需銀二十餘萬兩之譜每年約可節省銀一萬餘兩且塔爾巴哈臺土肥水美地廣人稀將來添開屯墾且耕且守富庶可期目前總屬制兵日後盡成土著於地方稍有裨益然後擇地修建城池蓋造衙署兵房安設營汛自可爲西北重鎮不僅一時兵增而費省也惟該制兵等攜眷出關迢迢遠道資斧維艱自應量爲津貼以示體恤擬請每兵一名除由地方官支給車輛外酌給川資銀六十兩卽在本年分撥軍餉內撥節助支毋庸另議籌款再奴才前准陝甘督臣譚鍾麟鈔稿咨會於奏請分撥關內外光緒十四年軍餉原摺內稱約計關外各軍悉改坐糧裁減善後經費每年可節餉銀五十萬兩此次奴才擬請裁撤營勇規復舊制意見頗與相同總之餉源有限用費無窮若不乘此稍能挹注之時設法補救則年復一年輾轉因循必致貽誤應請 旨飭部妥籌議覆以便遵照辦理並由奴才詳定章程分別奏請立案下部議奏○額爾慶額奏查塔爾巴哈臺地方除索倫錫伯額魯特察哈爾土爾扈特各旗部落蒙民外土著漢民甚爲稀少奴才派員查點共漢民一百四十一戶內除有眷口者九十四戶其餘均無室家旋據署糧餉理事通判劉鳳翔稟報戶口數目亦屬相符竊維民爲邦本必須人煙稠密地方乃有起色

雖經奴才設法招徠無如地處極邊天氣寒冷報警者仍屬寥寥坐令胥朕半歸荒廢殊為可惜奴才此次陳請抽調甘肅制兵攜眷來塔爾巴哈臺駐防蓋因甘肅相距較近風氣相宜將來該制兵等到防酌量發給牛具籽種飭令墾地開墾三年後按畝升科是於守戍之中仍寓屯田之法一舉兩得莫善於此如蒙 俞允奴才俟奉 諭旨後再行悉心酌奪辦理下戶部知之○張曜奏東省海面島嶼礁石林立往來船隻時有失事擬定預籌防範章程六條請 飭部立案得 旨戶部核議具奏○丁亥論軍機大臣等文碩二月十七日二十三日兩次奏均悉印藏通商一事英人約定並不催辦儼非隆吐設卡妄生枝節儘可相安無事此次開衅與通商絕無干涉文碩辦理此事始終不明機要於撤卡一節不但不竭力開導反代為曉辨力爭一旦兵燹卡燬束手無策乃欲藉通商為轉圜而於藏番之自行商辦又不攔阻種種乖謬輕忽深堪痛恨殊不思藏為中國屬地斷無聽其自主之理且以藏番之愚蠢豈知西國體例儼受其愚弄非藏地喫虧卽中國失體後患何可不防及今為挽回之計著升泰文碩接奉此旨卽傳集番官諭以通商事例非爾等所能知曉一經墮其術中追悔無及現如議有條款伊等不可遽允總須稟明駐藏大臣具奏由總理衙門覈定候有遵辦若並非定議更可由中朝與英國從容商辦但令該番從此不自添枝節印兵必不再進切不可因惶惑改圖又增虧辱也此旨著劉秉璋飛咨升泰文碩遵辦○

衛榮光奏浙江省陸續裁改營勇練軍礮兵等項迭次奏奉 硃批該部知道欽此欽遵在案近將海標練軍左旗裁撤歸伍津貼給至光緒十三年十二月初十日止又將楚軍達字後營親兵前營親兵兩旗全行裁撤各項薪糧均給至光緒十四年二月底止遣散弁勇循案僱用輪船裝送回籍又將楚軍達字副右一營改爲達字前後兩旗前旗委儘先副將張國林管帶後旗委儘先遊擊楊洪發管帶以資分布又鎮海新築及改砌各礮臺大致業已告成新購洋鋼大礮亦已分別安設完備本應添派弁兵演練加給薪糧津貼不得不略爲變通現在暫飭提標練軍中營全營駐守兼司演練油擦其薪糧津貼仍照練營舊章支給且俟演練純熟再行援案議加庶目前尚可稍資撙節第洋鋼大礮必須隨時油擦其油棉砂布等項在在需資現已按照原舊各臺成案酌給公費以資應用又鎮海新舊礮臺現在共有洋鋼大礮二十餘尊常時演練隨礮什物甚多不無間有損壞實非熟諳機匠不能措手且各該礮臺僻處海濱若仍覓匠遠地不特於事未便而費亦不貲現已常僱正副機匠各一名以便隨時整修其機匠辛工以及各臺公費均自到臺之日起支所有前項裁改勇練營旗以及礮臺僱用機匠增添公費各緣由據防軍支應局司道遵照新章詳請奏咨立案並聲明原報裁節長夫一千三百八十名統計大建月省銀四千一百四十兩仍隨大餉按月支出解由藩庫批解部庫備用彙案造銷在案現在達字親兵前後二營

又親兵旗一旗均已裁撤則原報裁節長夫亦應月日遞減計自光緒十四年三月初一日起應減長夫一百七十三名淨存裁節長夫一千二百七名大建月該銀三千六百二十一兩請一併奏咨等情前來臣覆查無異除咨部查照外謹附片陳明下部知之○戊子以尙宗瑞爲西安將軍○以奕謨爲內大臣○以裕德爲內閣學士○李鴻藻等奏等前將兩壩續得埝占丈尺並引河下截挑竣接挑上截溝縫等工緣由會摺馳報在案旬餘以來嚴飭兩壩跟接進占上緊趕辦一面催集料物俾資應手計自二月二十六日起截至本月初十日止東壩續得埝占三十七丈一尺連前共做成九十九丈一尺西壩續得埝占四十六丈六尺連前共做成一百九十六丈六尺邊埝土壩後復等工同時跟進一律澆築堅穩足資擊託惟河流變遷靡常近日東壩頭忽新漲攔河沙一道以致河勢擠向東壩大溜緊逼壩前水深至三丈四五尺日夜淘刷深慮搜根已成埝占不能不竭力加鑲搶護卽以後續進埝占工力既倍艱難續築尤須慎重未便操之過急致涉疏虞西壩埝占亦漸進至深水大溜仍靠北崖行走壩前水深二丈七八尺幸係順溜不至淘刷搜根尙可無虞刻下桃汛屆臨河水漲落無定臣等惟當督飭兩壩員弁併力工作不任稍緩期於早日蒞事仰慰宸廑第查歷屆大工告竣至遲不過二三月從未有四五月合龍之事今寶碁處此臣等惟有殫竭心力晝夜趨催特恐入夏後水勢盛漲人力難施能否幸告成功實無

把據此等所以慄慄危懼不敢不具實陳明者也報聞○庚寅調烏拉布爲鎮紅旗滿洲副都統以希隆阿爲正黃旗漢軍副都統○予故記名提督噶爾薩巴圖魯殷華廷照提督軍營立功後積勞病故例從優議卹○諭李鴻章奏永定河漫口合龍請將出力各員給獎一摺上年六月間永定河南七工西小隄四號漫漶成口經李鴻章派委道員金福曾方濬師督同員弁並調淮練各軍挑挖引河搶鑲進占業於本月初四日合龍大溜已由新河直達韓家莊尾閘出口全河復歸故道李鴻章督率有方著交部議敘在事出力各員尙屬著有微勞自應量予獎敘候補道金福曾著賞加二品銜永定河道方濬師著交部從優議敘候補知府石景山同知賈延馨北岸同知張起鵬均著俟離任後以道員補用署三角淀通判孫鍾祥著以同知補用揀發河工知縣孫傳栻著以直隸州知州補用知州施則敬著賞戴花翎其餘出力員弁准其擇尤酌保毋許冒濫○癸巳張曜奏前因招商局保大輪船在榮城縣成山觸礁沉溺被村民乘危撈搶一案查明情形覆奏並陳明此後沿海地方船隻失事應如何設法咨商北洋大臣大學士直隸總督李鴻章妥籌定章庶使商賈不致再受其害村民不致重陷於罪附片具奏在案伏查沿海島嶼阜雜礁石林立往來船隻一遇大霧迷漫亦易觸礁擱淺近海居民往往乘危肆掠其船員已沉者海島民人諳習水性不顧性命入水撈摸情固可恕其船隻僅止擱淺貨物並未沉海乃竟乘勢上

船恣意搶奪甚至圖財害命拆船滅迹罪實難追而被難船戶皆係異地商民不敢涉訟多不報案地方官亦遂不加深究久之相習成風直以搶灘爲生業甚如商船雖遇有損壞不敢近岸竟致全船淹斃慘不可言此實沿海各島嶼之通弊而榮城縣境海道最險搶灘之風尤盛光緒二年間曾經總理各國事務衙門奏定保護中外船隻遭風遇險章程鈔錄咨行到東當經前撫臣丁寶楨嚴飭沿海各州縣曉諭遵辦原定章程本極周密詳盡惟各處奉行不力遂致日久視爲具文亟宜重申舊章實力整頓茲飭東海關監督兼青道盛宣懷按照原定章程參以現時地方情形酌議章程六條分稟到臣並經李鴻章核明咨臣會奏前來臣遂條覆加確核敬繕清單恭呈 御覽下所司知之○甲午遭魁斌請 成貴妃殯宮前行初祭禮○倪文蔚電致李鴻章大工尙短二百二十餘丈約四十餘占每占三日始成用料百垛除存仍需兩千垛無可再辦借款又將告罄屆大汛口門收窄新工難守不惟虛擲鉅帑下游受禍更大 聖心亟盼合龍此時若遽請停工未必邀 允進止兩難如能將所問情形上陳亦顧全大局之義奏入軍機大臣奉 旨據李鴻章轉奏倪文蔚電信披閱之下殊深焦急兩月來據報進占情形每日四五丈不等李鶴年桃汛奏內有不日合龍之語倪文蔚奏亦有四五月合龍之語方冀事機順手勉奏成功不意倪文蔚突有此電謂每占三日始成料無可辦欸又告罄如此危急情勢該尙書等何以不會

銜早奏直至今日始由倪文蔚電致李鴻章爲先遞消息之計深堪駭詫且每占三日又與前奏情形不符如因水深溜急之故現在引河已成應否先行放河分溜俾口門勢緩可以加緊進占並有無別法可以相機趕辦均著李鴻藻等迅速妥籌尅日覆奏李鴻藻日前請洋款百萬聲明確估短少之數奏請續撥此奏尙在二月杪何以數十日來更無請款一語直待銀料俱盡乃和盤託出冀倖藉此歇手其窘急無術何至此極耶朝廷非不知工艱時迫程工非易但念江淮數百萬災黎無所託命及停工以後下游續出之患不堪設想但有一分可辦決無停工之理李鴻藻等當深體此意將一切實在情形及如何添籌辦法之處詳悉電奏是爲至要此有著李鴻章卽電該尙書等知之○丁酉兩省○岑毓英等奏臣等前將剿撫黑夷匪及籌辦善後情形專摺奏報於光緒十三年十二月二十二日奉 上諭黑夷地方應如何添設文武員弁扼要管轄之處著該督撫酌度情形妥議具奏等因欽此當卽檄飭提督行營營務處委員廣東補用知府李光翰分統副將陸春尉遼東曉參將謝景春等會同逐細查勘明晰繪圖貼說詳覆到省復經臣等批飭司道悉心查覈妥議詳辦去後茲據雲南布政使曾紀鳳會同善後局司道詳請查探黑以種人而名其地分爲上下改心在順寧府之西南隅普洱府之正西以瀾滄江爲限正北東北均界緬甸東界威遠東南界思茅南界孟連土司西南界緬甸西界牂牁野山西北界猛猛土司猛

猛之外屬耿馬土司東西四百九十里南北一千五十里皆山深箐密爲極邊險阻煙瘴之區中有辣綠江其水由耿馬發源會猛董猛庫引諸水東流入瀾滄江俗名小黑江上改心在江之北岸舊爲猛猛地東弄細些百竹林卡大蠻糯沒岡圈控各地方屬也下改心在江之南岸舊爲孟連地小關子蠻引大山圈糯蠻蚌大丫口過龍新寨邦糯錫丙各地方屬也俗重佛教故又有四大佛房之名其蠻蚌大丫口之間有康郎河源出康郎東江入瀾滄江俗名爲黑河至入裸黑之路由威遠西渡大蚌江與緬寧東路相會渡小黑江下游之蠻招渡以達孟連謂之東大路屬卡分道渡小黑江上游之蠻罕渡以達猛引通邦祖謂之西大路其地毗連耿馬孟連各土司與緬甸通處實爲順寧普洱兩府屏蔽今幸一鼓戡定自當設官建城以固藩籬細核該知府李光翰等稟勘輿圖惟下改心過龍新寨地方最爲扼要堪以建設城池又據署威遠同知彭述賢威遠營參將張梁稟稱圈糯地勢平坦路當孔道漢民較多煙瘴較少政教易行請於圈糯建城爲便等語查過龍新寨圈糯兩處皆可建城事屬創始尤貴周詳應飭該署同知參將等到任後詳加體察擇定一處建設城池衙署名曰鎮邊撫彝廳設直隸同知一員隸轄於迤南道凡新闢地方錢糧訟獄及新附各土職悉歸該同知經管該同知缺應定爲夷疆煙瘴題調要缺三年俸滿撤回內地升轉擬請先行酌量揀補一次以後照章辦理又應設同知知事一員駐下改心分防蠻引

大山蠻蚌大丫口各地方一駐上改心分防曰竹林卡圈控滾隔細些東弄各地方以資分治均定爲
煙瘴咨調要缺又應設鎮邊參將營歸普洱鎮統轄今擬仿照元新營之制設參將一員守備二員千總
兩升把總六升外委千總三升外委把總六升額外外委七升額設兵一千一百五十八名內馬兵四十
五名暫緩議設外應設十成戰兵五百零六名守兵六百零七名因雲南通省守兵僅設五成應照章暫
設五成守兵三百零四名其應分設汛塘應俟該參將到任後分撥妥協另案奏咨惟是新闢蠻荒賦稅
尙無定額糧餉不易籌措計惟有移緩就急查裸黑未經平定之先順營威遠兩協營地處極邊設兵較
多現在裸黑新設驛營則順威前面既有屏蔽後路自可騰挪擬於順雲協原額戰兵一千四百四十名
內抽撥四百零六名威遠營原額戰兵五百五十名內抽撥一百名以抵新設鎮邊營戰兵五百零六名
之額惟各營守兵僅復五成實無可抽撥擬於順雲協威遠營未復五成守兵額內先行撥復三百零四
名以抵鎮邊營五成守兵之額計增費仍屬無多所有該直隸同知一員應請援照景東永北直隸同知
額支養廉銀一千二百兩設役四十七名知事一員巡檢兩員援照威遠知事及新撫巡檢各額支養廉
銀二百兩各設役十名均照例章支給並請頒發新鑄同知參將關防各一顆俾昭信守惟該處孤懸江
外軍餉新定且建城垣衙署清查戶口錢糧一切善後事宜非熟悉情形明幹有爲之員難期辦理周

妥應請先委文武員弁前往署理以定吏情均先刊給木質關防飭令會同妥商籌辦暫由營後局酌給薪水俾資辦公其戶口錢糧稅課等則如何定額起徵以及估建城牆工料應俟該署同知等到任後切實查明造冊辦理等情會詳請委前來臣等覆加察駁商酌該河道等所議尙屬周密至新關吏竊治理不易請委熟悉明幹人員先往署理責成籌辦一切事宜實爲當務之急應請如所議辦理下部議奏○戊戌以奕綱署鎮前旗蒙古都統○諭軍機大臣等本日李鴻章轉奏李鴻藻等咸諫兩電均悉借款已諭李鴻章照辦現在大汛未到來源漲落無定口門尙寬溜勢深淺亦不一著一面預備固守新關物料仍督飭在工員役晝夜趕辦以冀竭力竣工至引河分溜亦爲加緊進占計仍著隨時相機辦理○諭軍機大臣等前因鄭工漫口全溜注准令會國荃等預籌宣洩之策嗣據該督等奏稱現就楊莊以下舊黃河二百餘里一律挑浚並由張福口至順清河挑挖引河以冀上游多分水勢先後諭令認真舉辦現在已逾數月各工籌辦如何情形目前是否竣事殊深慮系鄭工雖逐日進占而時促工艱伏汛以前能否合龍尙無把握著督飭在工各員實力趕辦不可遲緩一面將所辦工程先行奏聞○戶部奏續籌鄭工款項請就各省關所徵洋藥稅盤項下共撥銀一百萬兩限三箇月解齊貽誤者嚴參得旨允行○李鴻藻等電致李鴻章四月十四日奉電寄十三日 諭旨懷愧難名鄭工時促料艱萬分棘手二三月間

水勢甚平濬占頗順料亦應手冀四五月可以合龍乃至前月杪水深溜急工作喫力不能迅速占入深水用料倍多深有停待之慮現仍極力趕辦潘駿文以爲瞬屆大汛萬難合龍若口門收窄水不能容新工難守不如奏請停工將存料留待保險鴻藻等以大局關繫甚重苟不力籌堵合後患何堪設想但有一分可盡之力卽無一日可停之工然會晝夜趕催實無他法萬一大汛驟至人力已窮則亦無可如何若畏難希冀中止何以上對 君父下慰災黎實萬不敢出此也引河原爲合龍掣溜之用此時未便遽開當隨時體察辦理款項不敷甚鉅前經奏明先借商款百萬已到六十萬尙有四十萬目前暫可支持現據工局司道估需二百萬正在繕摺奏請續撥一切實在情形伏祈代奏又電報昨奉電 旨已會覆乞轉奏並請續撥三百萬無論何款仍懇代借百萬以應急需盼切感切李鴻章轉奏以部撥恐尙需時擬照前借洋商原平原銀一百萬不論鑄價歲息七釐如允行卽與商訂得 旨如所請行○庚子遣載勳詣 成賢妃殯宮前行大祭禮○李鴻藻等奏東西兩壩續得埽占丈尺並時日過促近築倍艱情形前經 等 督摺具奏在案半月以來河水日長溜勢提鉅靡常時而側注東壩時而斜射西壩刻下兩壩水深三丈二三尺至三丈五六尺不等週溜隨注立見搜淘新築埽工節節生險不得不竭力加鉅搶護冀保無虞仍飭一面盤壓大土以固已成之工一面接下埽占以收日進之益並飭添調兵夫人等分番

輪替晝夜併工毋任片刻停緩臣等仍隨時查察實力體催務於迅速之中力求穩固現計自三月十一日起截至二十五日止東壩又續得埽占三十丈五尺連前共做成一百三十丈六尺西壩亦續得埽占三十一丈五尺連前挑壩共做成二百二十八丈一尺邊埽土壩水戽等工均隨正壩跟進一律澆築堅穩惟兩壩均係深水進占鉤繩撐擋一切無不費手近日溜勢圍逼西壩致新進三十三四等占陡形刷墊當卽趕集土料一氣合力抬鑲寬日跟盤始得迫壓到底並酌拋碎石俾護免致搜根此後水勢愈進愈深鑲築倍應加慎現在節逾立夏工程僅得十分之六而應進占數尙多惟望汎水邇來臣等得以併力程功或可幸冀賊事得旨覽奏均悉此半月進占較前次奏報計少十丈之數自因水深溜急之故惟念伏汎期迫實深懸系應如何併工趨日以期迅速合龍仍著該尙書等加緊籌辦○辛丑崇保以病免以王毓藻爲山東布政使○岑毓英奏固圉必先講武選將乃可練兵滇省地處邊陲防務方殷前年欽奉諭旨裁撤勇營改勇爲兵凡各標協營實缺人員必使有才者得以各盡其用無才者不得濫竽其間庶倉卒有事方不致有疏虞若遵照部定輪缺章程專揀合例人員請補而合例者非現在得力之人得力者又非合例應補之員若拘守定章使軍營得力將弁以輪次不合不能請補不惟無以仰副朝廷甄拔將材之意而微臣亦無術策勵行間伏查定例派往出征員弁遇有軍營所出之缺儘歸軍營

量功升用等語今雲南既已改勇爲兵平時守邊固圉臨時禦侮折衝均係綠營專責凡寶缺大小將弁非打仗出身力能率服衆兵者不能請補合無仰懇 天恩俯念滇省武職各員帶兵在防與派往出征者無異准照軍營所出之缺儘歸軍營量功升用之例嗣後遇有缺出由 臣將歷在軍營出力最久之員揀選酌補其現任候補各員中如有才能出衆與例相符者亦一體序補總期人法並用不容稍有偏廢以副 國家儲養邊材之至意下兵部議奏○壬寅調王之春爲廣東按察使廖壽豐爲浙江按察使以葉永元爲貴州按察使○癸卯李鴻章奏查葡萄牙國即大西洋上年十月間經總理各國事務衙門主大臣與葡國使臣羅沙議定通商條約五十四款洋藥緝私專約三款當即奏明畫押本年三月初據津海關稅務司稟報該使羅沙由滬赴津換約羅沙旋於初九日來謁請期互換 臣電商總理衙門奏請簡派換約大臣將原約本請用 御寶作爲批准發下遵辦初十日奉 旨著李鴻章會同葡國使臣互換條約餘依議欽此由總理衙門恭錄知照並將畫押原本派弁齎送前來 臣即擇定三月十八日在天津水師公所公同互換屆期 臣率同津海關道及天津道府通商隨員等該使羅沙亦偕同該國領事羅譚等一併齊集羅沙將葡國批准條約畫押原本交 臣驗收 臣即將總理衙門發下恭用 御寶條約原本交該使祇領彼此核對無訛仍公立換約文憑華洋文一樣二分畫押蓋印各執一分附釘原約之後

以昭信守至原約第二款內稱澳門地方現經商定俟兩國派員妥為會訂界址再行特立專條其未經定界以前一切事宜俱照現時情形勿動彼此均不得有增減改變之事等語一面詢羅沙據云澳門定界擬俟該國續派使臣駐華另行商辦該使於換約後即起程回國下所司知之○甲辰以京師得兩上親詣 大高殿報謝○乙巳以博棟阿為墨爾根城副都統○戊申奉移 成貴妃金棺暫安田村

行宮○己酉福州將軍醫慶卒賜卹如將軍軍營病故例戰功事蹟交國史館立傳並准於立功省分建祠○調希元為福州將軍以長順為吉林將軍定安為正白旗漢軍都統○以恭鏗為黑龍江將軍○庚戌李鴻藻等奏 臣等前將兩壩續成丈尺會摺馳報欽奉 硃批覽奏均悉此半月進占戰上次奏報計少十丈之數自因水深溜急之故惟念伏汛期迫實深懸系應如何併工趨日以期迅速合龍仍著該尙書等加緊籌辦欽此跪誦之下仰見我 皇上垂念要工至意 臣等欽悚難名計自上次奏報丈尺後截至本月初十日止東壩又續成三十八丈一尺連前共得一百六十八丈七尺西壩亦續成三十三丈八尺連前挑壩共得二百六十一丈九尺邊壩土壩水戽等工分路並進一律澆築堅穩仍嚴飭兩壩員弁激勵兵夫奮勉從公不准稍形鬆懈冀早竣事仰慰 聖懷惟是二三月間雖桃汛經臨水勢並未大漲兩壩剋期進占料物亦尙敷用事機甚順竊意五月內可望合龍乃自入夏後汛水漸長河心復漲沙灘

致大溜緊逼兩端搜刷堪虞前此每占鑲築五六坯茲則鑲至九坯十坯進占喫力用料倍多竟有一占用至百餘坯三日始成者計現距夏至不足一月口門尙有一百八十餘丈然使料物應手盡夜催趕再進三十餘占便可堵合無奈統計現存之料不敷尙多至少亦需一千五六百坯近處已搜括殆盡遠在二三百里外者時值農忙更無車輛轉運至一月間即在周家口設廠收買由水陸運工刻下雖有來者亦苦無多現惟有就所存之料極力撙節仍一面嚴催進占一面湊集料物竭力籌辦當此工已垂成斷無中輟之理特恐料物不能接濟大汛驟至人力已窮此則焦急萬分徬徨無措者也得 旨覽奏均悉工已垂成斷無中輟所見甚是該尙書等當懷遵迭次諭旨設法廣籌料物妥速進占總期及早合龍以慰屬系○辛亥金州副都統聯恩以病免

五月壬子朔以連順爲金州副都統○癸丑予故大學士左宗棠雲貴總督劉長佑於江西省城建祠○甲寅頒給福建省城道南祠匾額○乙卯京師奉天山東地震○恭鏗等奏光緒十年准戶部奏奉 諭旨會同京旗都統籌議移撥旗丁十戶前來黑龍江省呼蘭河南夾荒墾地興屯當經前任將軍文緒遵飭北園林子武營委協領等就近妥爲安置並編旗入冊以資管束咨報在案奴才恭鏗到任後查悉奉撥京旗十戶內與保一戶未經起程在京報故實止九戶在屯嗣據該武營委協領常德先後稟報營祿

廣厚二戶男婦故絕安慶雙福二戶挾容潛逃所有恩常德昌吉潤吉凌成純五戶均以不諳農業呈請回京當差並具押結等情奴才等當卽一面分咨各城捕緝在逃丁戶一面嚴飭該武營委協領撫慰在屯丁戶並加派委員前往宣布 朝廷恩澤德意勉令自安甫逾數月又據該武營委協領常德稟報恩常德昌二戶續逃前來奴才等伏查呼蘭河南夾荒等地爲北園林子膏腴上產歷任將軍詳加察看選留京旗撥屯具有深意當九戶遵撥赴屯部議參仿雙城堡舊案治裝途費以及沿站車輛住房器具均經前期咨照措辦周妥寬示體恤原冀安居樂業庶可漸推漸廣資固邊維乃爲期末及四年逃亡已至過半殊出經營意計之外奴才等深求其故該屯戶等幼嘗京差優游 筆轂之下於農田攻苦力作諸事本非素嫻加之地氣苦寒水土亦不甚服目見同來之人男婦俱絕尤屬慘切痛深愚者尙哀詞乞恩狡者則決計潛逃奴才等撫馭乖方固難辭咎惟念在屯所餘三戶前懇回京當差詞意已極哀切若不別籌辦法歷時愈久仍恐迫不安生更覺抱慊無地據奴才等愚昧之見擬卽援照部議撥屯前章給予川資車輛咨回原旗另募代墾之戶以重屯課抑或再山京旗加撥丁戶接續屯墾俾就性情熟習者相維相持冀收後來之效奴才等未敢擅便伏懇 聖明垂察飭部核議俾有遵循下戶部議奏○丙辰臆衍聖公孔令貽福壽字三鏤玉如意荷包袍褂料綢緞尺頭○丁巳李鴻藻電致李鴻章水勢未大漲口

寬不及百丈兩嶺共進十七八占便可竣事惟大放料價仍難湊集進占已不敷用防險何從籌備焦急無似月半前後如有成局當再電聞祈代奏軍機大臣奉 旨李鴻藻電已悉大功垂成惟患料缺務須設法加緊購集撒手趕辦此時成敗之機在於俄頃不可稍有遲延致誤大局勉之○己未欽奉 慈禧端佑康頤昭豫莊誠皇太后懿旨皇帝大婚典禮著於明年正月舉行○庚申諭軍機大臣等前據劉瑞芬電報四月十三日藏番出攻印兵營卡又復敗退當經總督電詢近據英使兩次到署云接印督電稱近又兩違藏官但令藏眾退回原界仍守二年以前情形不在隆吐山紮兵以後便可照舊辦理絕不欲侵入藏地致礙兩國和好等語此電在十三日藏印再戰之後印督猶作此語無非顧全中英和約畫一轉圜地步惟伊所云原界即從前所指修路至故勒布拉山嶺而止決不越此嶺一步按之藏中所繪新圖即捻納修路之地也捻納以南隆吐以北邊荒廢棄藏人久置不理故日納宗營可付哲都捻納修路亦不阻攔迨修路已成此一段地方英人早已視為保護境內縱令先期撤卡已難以口舌相爭況今已迭次交綏兵爭所得更不再讓此皆前諭屢次明白開示而藏眾冥頑不悟以致此時萬難置辦者也為今之計印督既有不進原界之語藏兵卻不可有再出捻納復仇之事但令安分不動以後一切均易商量向來藏務專歸商上開第穆呼圖克圖素日人向和平曉事現在掌辦商上實有專歸著升泰

於奉旨後傳諭第穆加以策勵即專委該呼圖克圖一人將此事妥爲了結儘能深維終始仰體朝廷擬庇深恩保全藏定當優加獎賞若惑於衆論不顧全局以後兵交無已自速敗亡求如現在轉圜尙可完守捻納定界而不可得亦惟該呼圖克圖是問總之及時自守尙可藉此收帆自非心如頑石必當言下領悟也○癸亥夏至大祀 地於 方澤 上親詣行禮○以捐田賑族賞給甘肅提督周達武匾額○丙寅唐炯奏 上於上年十一月曾經赴昭通東川相度開辦廠務附片陳明在案隨於十一月初九日出省二十五日馳抵昭通適東洋礦師亦到達率同周懋萬山時逾三月勘得永善屬之棚父山青山魯甸屬之香杉箐巧家屬之白錫臘銅脈豐厚威寧屬之榨子鉛脈盛大均經酌定廠規飭礦務公司商人遵照設廠次第攻採其本山及附近數十里百餘里產礦之區公司不及開辦者咸聽鄉民自行攻採公司量濟油米但不准設鑪以杜走私所獲礦砂公司按照成分給價收買俾鄉民得此現錢周轉盡力攻採數年之後便可都成子廠舉凡攻採煎鍊皆先用土法不合始參以西法大要以養活窮民爲主至於廠中砂丁數雖衆多均飭厚加撫恤勒以部伍嚴禁燒會結盟不致別滋事端並遴員駐廠彈壓保護以臻周密俟通東銅廠著有成效再以次接辦通南威寧鉛廠著有成效再以次接辦水城庶人皆練習於部分事有後先無虞拮据惟是所開銅鉛各廠皆係新山據東洋礦師面稱必須深入山腹四五百丈始

得連堂大礦而石硤堅硬既不用機器非八九箇月不能見功臣詢之老於在廠者亦謂數丈十數丈即獲礦者係屬草皮不能結堂以供久遠採取其言近理臣惟有隨時督飭公司晝夜攻採以期及早觀成不敢懈弛下戶部知之○唐炯奏雲南銅務自康熙四十四年歸官經理向各府屬州縣領借帑本慎選殷實民人充當鑪戶招募砂丁開採煎鍊定章上月發本下月收銅逾年無著即令經放之員賠繳立法本極至善乃相沿日久通員漸多雍正二年至乾隆六十年廠欠之案有以錢恩彌補者有以庫平扣市平銀撥補者有經放之員賠補者有以經管道府養廉扣補者嘉慶六年乃定督撫司道按股分賠之例其時廠旺礦豐而虧欠猶不能免推原其故地方官民事紛繁斷不能坐守山場酌劑盈虛妥為籌畫鑪戶又係赤貧勢必挪後補前暫蠲目下既而逃亡故絕懸項纍纍無可追償惟有據實陳請乞 恩代免此嘉慶以後屢請豁免廠欠之情形也同治十三年試辦京銅或委員或委紳仍須預發底本乃能陸續繳銅時值兵燹之餘薪炭日昂人工益少承辦員紳皆不諳習礦務不能不聽命於鑪戶以故辦理十餘年仍難獲效而通員又多光緒九年設立招商局接辦以商本不充仍先發底本雖令按銅扣收然釐欠未清新員已藉此又同治以來辦理廠務虧欠之情形也伏念銅本關繫庫儲絲毫為重若不變通釐章無以革除積弊臣現酌留招商局責成扣收廠欠另設礦務局招募鉅股商本商辦先銅後銀委員駐廠

但只彈壓保護收運銅斤俾界限劃清公私兩益庶堪持久至於京運而外例有通商之銅光緒十二年督臣岑毓英奏明每年辦運京銅百萬斤准一成通商以次遞加原冀款動軍情不致畏難裹足無如承辦員紳不一資本厚薄不齊所辦銅斤悉歸官買每年湊集五十萬尙屬爲難安有餘銅通商且民間數十年不見商銅而所用器具與日俱增無賴奸民遂銷燬制錢以牟厚利卽以雲南而論已有錢荒之患關繫誠屬匪細臣愚以爲欲杜私燬莫若寬准通商擬嗣後每辦銅百斤抽課耗銅十四斤官買七十六斤外准以十斤通商庶商有餘銅藉以維持資本而民有餘利自然踴躍攻煎數年之後開辦日多銅斤日廣銷燬之弊不禁自除於錢法銅務不無小補得 旨如所請行○聖鴻臚奏臣前接國子監咨具奏應辦事宜一摺原奏內稱各省舉貢生監如家有藏書情願捐送國子監者由學臣代收轉解其卷數較多足稱善本者由學臣奏請賞給監屬虛銜卷數較少者由學臣量給匾額等語奉 旨依議欽此恭錄咨行到臣卽經飭學曉諭茲據歸安學詳據廬生陸樹藩附生陸樹屏呈稱伊父從一品封典開復原銜前廣東高廉道陸心源因監中廣求書籍選擇家藏舊刻鈔鈔爲近時版本所無者一百五十種共計二千四百三十三卷願行捐送到監附以所刊叢書等又三百餘卷並稱伊父並監生等均不敢仰邀獎敘等因前來臣查陸心源同治初年解官歸里時值東南兵燹之後書籍散亡該員竭力講求收藏富博且

多宋元精裝得書之盛冠絕一時其家所藏親澹心著述校刊古書皆罕見之本光緒八年曾於縣屬之仁壽鋪地方建閣五楹儲書一萬餘卷歸公仿范氏天一閣例許好古者就閣借鈔已由該府縣通詳在案茲復將所藏繕鈔善本捐入國子監至二千數百餘卷之多此蓋伏遇 聖朝文治昌隆昭仰雲漢大收篇籍廣開獻書之路視前古尤有過之傳播藝林洵爲盛事而如該員之搜探功勳嗜學不倦慨捐藏籍進獻 成均較之尋常善舉似更難能可貴雖據聲稱不邀獎敘未便沒其惻忱可否仰懇 天恩將在籍從一品封典開復原銜前廣東高廉道陸心源傳 旨嘉獎以爲稽古尚義者勸 上諭聖鴻臚奏在籍道員捐送書籍開單呈覽請旨嘉獎等語前廣東高廉道陸心源因國子監廣求書籍選擇家藏舊書一百五十種計二千四百餘卷附以所刊叢書等三百餘卷願行捐送到監據稱陸心源自解官後刊校古書潛心著述茲復慨捐羣籍洵屬稽古尚義伊子廩生陸樹藩附生陸樹屏均著賞給國子監學生銜以示嘉獎○丁卯 上諭 大高殿祈雨○李鴻藻奏 等前將東西兩壩續成埽占丈尺並嚴飭趕辦緣由於四月十九日會摺馳報在案旬餘以來汎水時有長落溜勢亦深淺不一 等督率兩壩員弁跟接進占晝夜催趕以期迅赴事機惟現在正料短缺尙多而東壩尤其難竭力購辦終恐緩不濟急難免停待之處當與總辦東壩事宜前山東臬司潘駿文悉心籌議潘駿文以料艱時迫非就中設法騰挪

不足集事東壩係照奏定丈尺按正壩及上下邊壩夾土壩五路並進西壩嗣議減去下水邊壩一路本爲節料併工之計今工程已得十之七八必須兩壩緊對不致參差庶合龍時較爲得力莫若將東壩下水邊壩一路亦行減去既可與西壩相對進占並可節省正料三百垛等一再商酌意見相同當飭於三十七占起照議辦理計自上次奏報丈尺後至四月二十八日止東壩又續得四十二丈五尺連前共成二百一十一丈二尺西壩亦續得五十九丈一尺連前共成三百二十一丈邊壩土壩水壩等工均隨正壩跟進一律澆築堅穩現在測量口門僅存一百十餘丈亦不過再進二十占之數現飭兩壩各半分做以兩日一占計之約至本月下旬可期竣事惟是時近夏至大汛將臨漲水之遲速難知天氣之陰晴靡定而料物能否接濟亦皆未敢預期臣等每一籌思焦急之餘尤深悚懼倘得事事順手則至本月望後應已具有規模彼時當卽迅速馳奏仰懇 聖懷得 旨覽奏已悉著該尙書等懷遵電寄諭旨妥速辦理總期早竣大工用慰股盼○庚午唐炯奏貴州鉛務自嘉慶中奏歸貴西道衙門管理一切折收名目繁多規費甚重卽如白鉛每交鉛百斤除正課之外既抽規費四斤十兩又抽鉛費銀二錢一分黑鉛每百斤除正課外既抽規費二十斤又抽火課并配銀二錢六分二釐其他折扣不可枚舉所取借於公家殊非情理是在承平時廠戶已不能支況值兵燹凋敝之後此廠務所以廢壞民生所以日困也

前山西道李用清曾經示免近復如前折收茲據書與西道袁開第請明定章程開單減免前來臣維前代皆損下益上 國家定制則損上益下 深仁厚澤薄海同沾今則上下俱損盡歸中飽礦務特其一端擬此後每收買白黑鉛鎔淨天平秤一百五十斤作一百斤隨收一斤以爲貴西道衙門辦公之費發價不准折扣官親幕友衙役不准駐廠設局以歸簡易而杜禁索其餘一切規費名目相應請 旨飭下貴州巡撫嚴行永遠禁革如違參處庶廠務可冀日有起色例價不難復舊待 旨知道了所收買鉛斤積弊自應認真剔除著唐炯咨商藩臬將此項章程核實酌定外並將一切規費名目嚴行禁革以杜中飽○辛未諭御史趙增榮奏應補部員補缺例文未甚明職請飭詳細分晰及五貢教職發憑後始報事故請飭查議處各摺片著吏部議奏○甲戌諭色楞額奏請調員辦理營務文案等語著新疆迪化府知府疏勒直隸州知州蔣誥甘肅新疆補用知縣陳純治陝西補用知縣甘肅湘著劉錦棠飭令該員等前赴伊犁行營交色楞額差遣委用○葉伯英奏查陝省各屬從前設有窩鋪稽查奸宄謹送行旅以輔保甲之不足兵荒而後良法久廢臣於上年出省巡閱營務通飭各屬於四鄉行人往來大道接五里舊規安設窩鋪一座無論瓦房土窖均遵議定寬深丈尺規式修理其有人煙稀少山坡險峻難以拘定程途之處或三七里各就地勢相宜酌量設立每鋪派撥巡夫二名專司盤詰防護由該鄉地保戶分派輪流

住宿一切旗幟器械燈油磨麵概令各屬州縣籌製造散發臣定章行知後復檄飭臬司督催趕辦旋據東西兩路西安同州鳳翔乾州邠州及南山漢中興安商州北山延安榆林綏德鄜州等府州屬陸續具報一體修理完竣由司委員分查相符於去歲及今春巡閱之便遍歷查看見新修衙鋪房屋整齊器械精緻星羅棋布洵足以協緝奸匪防護行人卽夏秋偶逢驟雨人馬亦堪休憩似於保甲守助之義愈資周密報聞○丙子諭軍機大臣等升泰四月二十二日奏摺片均悉所論英藏各情均尙中肯惟該大臣具奏時尙未知四月十三日藏番又有出攻印兵營卡之事且在熱納巴拉嶺外修築石壘是藏衆復仇之意未息此時欲令印兵先撤雖費盡口舌亦辦不到該大臣摺內先解戰爭一語甚屬扼要印兵之不入藏地英人屢爲此語但令從此不自生枝節印兵必不再進毋庸過生疑慮若必固執成見希冀爭回隆吐山地方再與羣鮮則兵連禍結勢必不可收拾五月初九日電飭該大臣傳諭第穆呼圖克圖將此事妥爲了結其築壘一節並經總署電詰著遵照迭次諭旨所指各節迅速辦理該大臣到任後應否親往與英官面議抑派員前往並著相機妥辦其傳諭第穆後情形如何卽行奏報○曾國荃奏皖南茶釐軍興時需餉孔急所定稅捐爲數太重嗣經迭次奏請減免茶商尙形竭蹶近年以來印度日本產茶日旺售價較輕西商皆爭購洋茶以致華商連年折閱遐邇周知據皖南茶釐總局具詳光緒十一十二

兩年虧本自三四成至五六成不等已難支撐十三年虧折尤甚統計虧銀將及百萬兩不獨商販受累卽皖南山戶國戶亦因之交困迭據皖商赴局環叩稟請轉詳酌減稅捐雖經喻以大義勸令共體時艱勉力輸將無如商力疲困負累難堪向來茶各號均於清明節前開設本年新茶上市各號迄未定議營運俱窮空乏莫補目今茶業艱窘更甚於昔年皖南茶軍每引奏定收銀二兩八分內有捐銀八錢擬請援照成案暫行減免二錢每引徵銀一兩八錢八分藉以稍輕成本俾觸其鼓舞之心或可收招徠之效瀝情懇請具奏前來臣查皖南茶釐爲長江水師餉源所繫本難輕議減免惟據各茶商稟經總局剴切具詳以皖茶被洋茶壟斷商力難支新茶業已上市各號迄未定議設覓紛紛歇業必致餉源立涸與其商散而稅無可收何如減捐而餉仍可保據稱每引暫減二錢以輕成本自係爲顧全商業起見現在茶市已臨迫不及待除批令先行通飭遵辦外理合陳明下戶部知之○戊寅予剿擒淮軍陣亡傷亡文武員弁於直隸省城建立昭忠祠○楊昌濬等奏准兵部咨議復益壽武職改設員缺一摺奉旨依議欽此鈔錄原奏內稱所請安平水師副將移紮後山水尼暨安平以下水師各營均改陸路應毋庸議至遼東應如何設官控制准在附近水陸營分抽撥布協等因准此查遼東洋面遼闊港汊紛歧緝捕巡防關繫緊要部議以經制水師各缺未便全改陸路係爲專汛防守起見至安平水師副將昔年建設原屬

要缺第沿海情形今昔不同而臺東控扼後山設武職大員未便稍涉遷就臣等往返函商安平值距臺南府城數里臺海總兵有水陸兼轄之責駐紮府城足可照顧海口副將一缺久爲虛設臺東爲後山扼要之區非參遊所能鎮壓就近營分無可抽撥現又未便輕議添設徒糜餉需若以安平水師副將改爲臺東陸路副將所屬中右兩營都司等缺隨同移撥其左營遊擊現駐鹿港將來中路有撫標兩營分布不虞單弱應將鹿港遊擊作爲安平水師營遊擊隸臺海鎮管轄所有臺海鎮屬之恆春遊擊改隸臺東仍使鎮協兩標各符原營之數似此址爲佈置偏項毫無所增於新設地方得有實濟而於水陸營制亦屬相符相應請 旨飭部議行下兵部議奏○己卯李鴻藻等電致李鴻章兩摺各餘三占本擬二十七八挂纜合龍乃二十一戌刻西壩進至六十占因急溜洶深陡然壩陷將網鑊船壓入水中繩纜未斷起撈不出適阻進占之路正在設法問二十四亥刻東壩正壩亦遽趕緊搶鎮二十五申刻上邊壩一占竟至走失當壩緊之時出此意外之事萬分焦急現已水深六丈餘條再擡高脚當相機開放引河伏汛伊邇深恐功敗垂成不勝急懼伏祈代電奏軍機大臣奉 旨兩壩壩陷走占情形殊深焦急仍著嚴督在工員弁趁此汛期未到水勢尚平齊心併力加緊趕辦以期即日竣工勿因小有失挫稍涉退縮惟致誤全局懷之勉之○庚辰予故原任湖北提督傅振邦事蹟交國史館立傳並於山東昌邑縣原籍建

六月癸未諭張曜奏遵有察看道府據實撥款一摺山東督糧道鍾洛為任用家丁石審田劉思成致被參奏前經該撫飭令曜逐仍留在署管事並有借給幫管庫款銀兩及收受餽送壽禮等情實屬不知檢束鍾洛為著交部議處青州府知府裕彬雖據離稱該員心地樸厚尚無別項劣跡仍著張曜隨時察看如不知振作即行據實參奏○李鴻藻等奏臣等前將東西兩壩續成丈尺會同具奏本月十五日奉到硃批覽奏已悉著該尚書等懷遵電寄諭旨妥速辦理總期早蒞大工用慰股盼欽此跪聆之下悚惶莫名半月以來臣等嚴催各處稽料並放價收買一面督飭員弁跟接進占當此炎天烈日之中萬夫勇集工作無敢少緩計截至五月十五日止東壩又續成三十六丈連前共得二百四十七丈二尺西壩亦續成三十七丈九尺連前挑壩共得三百五十八丈九尺邊埝土壩後戩等工同時並進一律湧築齊全繩量口門僅存五十餘丈約計兩壩各進五六占即可趕辦合龍惟是節逾夏至汛水漸長口門愈收愈窄水勢日見擡高現在兩壩占前水深自四丈七尺至五丈六七尺大溜緊注洶湧異常每下一占追壓至一晝夜尚不能到底穩固人與水爭萬分喫力雖所剩占數無多而鑲築倚植艱難即成占不能迅速惟有概用薄柴厚土逐坯盤壓以期穩慎堅實不使稍有疏虞現擬兩壩占數做完即飭趕進門占俟定

有合龍日期當即迅速馳奏仰慰 宸廑報聞○甲申予故陝西巡撫劉蓉貴州布政使李元度四品卿銜內閣中書郭鴻臚附祀湖南故大學士曾國藩祠事蹟交國史館立傳○予故陝西陝安鎮總兵福誠浙江提督鄧紹良建祠○丙戌 上詣 大高殿祈雨○李鴻藻等電致李鴻章二十九日奉電 有惶悚吳名遵即嚴督員弁加緊趕辦奈至二十一日後水勢極高深至八丈許兩壩占壩時有墊陷晝夜搶鑿西壩敗船未能起出以致阻礙進占就延時日現在相度引河頭形勢若驟開放尙難奪溜止得稍緩惟有竭力設法以冀竣工祈代奏軍機大臣奉 旨前據二十六電奏兩壩只餘六占走失僅止一占滿冀及時補進當可不日竣功因僅令加緊趕辦今逾八日又據初五電奏披閱之下殊深憂悶電中語多含混與前奏又不相符前奏係二十六日云現在水深六丈餘此電則云自二十一日後深至八丈許前奏云六丈後備再擡高即開放引河此奏則云深至八丈尙難奪溜彼此參差已覺可異至西壩被壓之網鑿船既在墊占之下自難擡起豈不能追壓到底耶今半月之久竟至無術可施尤不可解歷屆大工合龍皆先定放河之期溝工綫工均列專款誠以引河深暢方可掣溜合龍今水勢高深八丈尙云不能奪溜其爲引河平淺不合式恐開放淤塞倒溢可以想見而來奏則未明言前次走失一占數日內曾否補齊所云兩壩時有墊陷是否即前電所云抑係另有別處均未聲敘明晰現在引河既不能開敗船又

不能起自二十六後竟似未進一占所云設法竣功究竟如何設法得非束手無策虛詞掩宕耶以上所指各節著該尙書等卽日據實明白電奏○丁亥兩○戊子又兩○錫珍等奏爲政之道首貴得人庶務之司端資羣力吏部銓衡關涉一切公事分隸四司曰文選曰考功曰稽勳曰驗封四司中以文選司爲最要事亦最繁 聖朝籲俊旁求登進之途日廣部務亦日增自捐例開而事倍徙保舉多而事更繁每月投供人員有多至四五百人者每月分發人員有多至三四百人者內而銓選推升外而升遷調補端緒紛龐掌印幫印司員固屬無旁貸管股司員一股公事幾與各部一司相等且各部司員中有充補軍機章京總理各國事務衙門章京者尙可兼本部行走吏部司員一經傳補卽不能兼顧部務其事繁重已可概見自同治三年因保獎之案紛至沓來於文選司特置派辦處派滿漢總辦幫辦管股司員十餘人專司其事每遇獎案到部察核册檔分別等差參稽例案極爲繁重近來保案愈多奏議之件月或數起十數起不等宛於四司之外別爲一司而辦事者則仍文選司之員往往以一人而兼數事今昔情形迥異不能不籌久遠量議變通查吏部滿漢司員多由配簽分部茲欲得人而理必酌增分簽吏部之以惟配簽事例向係按各衙門額缺定簽之多寡若但議增分部之簽而額缺祇有此數恐敘補無期難資鼓勵則欲酌增分部之員必須酌添額設之缺近年京官添設額缺者光緒六年十一月宗人府

奏增設宗室郎中員外郎主事各一缺光緒十二年六月步軍統領衙門奏添設員外郎一缺主事一缺筆帖式二缺光緒十三年七月太常寺奏添設滿寺丞一缺其外官添設額缺者不勝枚舉均先後奉旨允准在案謹考 欽定大清會典內載 臣部司官 國初時有理事官副理事官額哲庫啟心郎等名嗣裁滿漢啟心郎缺改理事官爲郎中副理事官爲員外郎額哲庫爲主事又 皇朝通典內載通制滿洲蒙古漢軍司屬大部皆統爲員額不分專曹悉聽堂官調撥後始分司定缺其漢人司屬則順治元年卽隨曹置額又 皇朝通志內載各司員額初制裁增不一後定設如今制各等語現定爲滿郎中九缺員外郎九缺主事十缺漢郎中四缺員外郎五缺主事六缺查大部司員額缺戶刑二部司屬多至數倍毋庸比較卽以吏禮兵工四部而論 臣部司員滿缺少於兵工部漢缺少於工部實屬事浮於人 臣等公同商酌除考功稽勳驗封三司缺額悉仍其舊毋庸輕議更張擬請於文選司原定額缺外添設滿漢郎中各一缺滿漢員外郎各一缺滿漢主事各一缺均作爲文選司永遠額缺並請將新增之滿郎中一缺作爲選缺滿員外郎一缺作爲題缺滿主事一缺作爲選缺漢郎中一缺作爲題缺漢員外郎一缺作爲選缺漢主事一缺作爲題缺一切選補輪次與原定額缺接算悉照定例辦理庶辦事司員有所鼓勵而 臣等亦得收指臂之助於部務大有裨益 上諭吏部奏部務煩重請添司員額缺一摺吏部文選司事

務煩重近年更甚於前據該司額缺本少不足以資分任自係實在情形著照所請准其添設文選司滿漢郎中員外郎主事各一缺此外各衙門不得援以爲例○己丑 上詣 奉先殿 壽皇殿行禮○庚寅以新疆巴里坤城東關新建故大學士左宗棠祠予死事官兵士民一千九百餘名附祀○辛卯諭前經明降諭旨各直省應行旌表婦女仍照例由該督撫題請或由同鄉京官赴部具呈或由禮部照例核辦其內外臣工概不得率行濫請茲據御史莊子楨奏請將節婦馬王氏旌表等語萬王氏著禮部行查原籍照例辦理該御史徑行奏請旌表殊屬非是莊子楨著交部察議○壬辰諭卞寶第奏查明劉長佑子孫遵旨履陳等語前雲貴總督劉長佑之子劉思謙著加恩以同知用伊孫光祿寺署正劉繩武著加恩以主事用○李鴻藻等電致李鴻章初八日奉初六日電 旨楊勝惶悚大工堵合本當一氣趕成稍停則口門溜急占底被淘末有不墊二十一日以前水深不過四五丈以後漸長至八九丈東壩自四十二占至四十六占接連墊陷晝夜搶鑲壩頭一占屢鑲屢陷卽不能挂纜前進西壩下邊埝第四十占亦經走失挑壩第六十占墊陷之後鑲至四十餘批尙不能高整自五十七至五十九各占亦此鑲彼墊致多費料物時日蓋每進一占先安紮鑲船將纜纜百餘條一繫船上一繫壩頭以次撐撐此次敗船爲墊占土料所壓沈入水中船身長十三丈橈高五丈阻攔壩前以致不能進占無論更換新船難以撐擋

卽勉將土料盤歷亦斷不能開氣道光年間半工卽因此失事爲患甚大多方起撈不出時日耽延大半
因此現在已將船桅繫住船爲急溜衝擊幫底均已浮出第六十占漸次盤纏東壩走失一占亦經補齊
當卽趕緊前進至引河已開昨經由電具奏口門雖較輕鬆而全溜尙未舉動惟望下游暢行無阻則大
溜自當輕減矣此次工程滿擬五月內卽可竣功不料事機不順生此波折以致遲擱多日焦急如焚非
敢有意延宕也目前伏汛已臨但有一分可爲無不竭盡心力若至人力已窮則亦無可如何祈代奏軍
機大臣奉 旨覽奏二十一日以後大工詳細情形稍釋慮系現在西壩敗船已出東壩失占亦經補齊
著卽將飭在工員役將餘剩六占加緊編進冀乘大溜分洩之際連竟全功其引河之水現到何處暢滯
情形若何並著隨時確探電聞○癸巳以京師得雨 上諭 大高殿報謝○甲午以烏拉布兼署吏部
右侍郎○以希隆阿署鑲藍旗蒙古副都統○乙未雨雹○予故塔爾巴哈臺參贊大臣錫綸祭葬○予
故湖廣總督吳文鎔於江蘇揚州府本籍建祠○丙申奎潤等奏恭查會典內開 國家有大慶典則有
加上 皇太后徽號禮以極尊崇之義等語又查順治八年十一年康熙四年同治十一年 大婚成案
均於禮成後舉行崇上 徽號典禮各在案現在欽奉 慈禧端佑康頤昭豫莊誠皇太后懿旨 皇上
大婚典禮於明年正月內舉行自應查照例案請加上 慈禧端佑康頤昭豫莊誠皇太后 徽號以

隆 孝治而光 盛典伏候 命下由內閣恭擬崇上 徽號字樣進呈 欽定其一切應行典禮由禮
部行知各衙門豫期敬謹辦理 上諭本年五月初八日欽奉 慈禧端佑康頤昭豫莊誠皇太后懿旨
大婚典禮著於明年正月舉行欽此本日據禮部奏大婚禮成謹請加上 皇太后徽號一摺 聖慈謙
抑爲懷未遑 允許朕以恪遵 成憲典禮崇隆竭誠籲懇至於再三始荷 俯如所請所有應行事宜
著各該衙門敬謹辦理○戊戌子安徽績谿縣孝子章恆謙章恆福孝婦章洪氏旌表○張曜奏前因河
南鄆州工程辦理極爲順手不日合龍趕即馳赴上游曹州河防督飭工員加意防守附片奏明在案上
拜摺後即馳至曹州府屬沿河修防均尙認真惟濮州范縣民埝尙有單薄之處已嚴飭曹州府積慶督
同該州縣趕緊添夫加修以冀穩固至直隸開州山東濮州交界之辛莊埝上年漫口之處查看新築
臨河直埝一千五百餘丈業經會辦河防局道員張上達率同游擊張化忠並印委各員修築完整正在
加添埝壩初八日接准河臣電信並接鄭工偵探委員電報知初六日鄭工開放引河勢甚順利大溜已
向東趨當即飛飭上下游沿河兩岸在工員弁嚴密防護初九日寅刻黃流已抵東境及至午未之間溜
勢奔騰洶湧異常幸河身已經挑淤抽溝黃流東趨勢尙順速河岸頂衝之處險工已有埝壩者日久風
吹日曬不免乾枯一經水浸率多墮陷卽由各防營委員隨時添料壓土惟水勢初十一兩日當逐漸

增大除督飭工員認真防護外所有黃流已入東境督率防護大概情形理合恭摺山驛馳奏報聞○己亥欽奉 慈禧端佑康頤昭豫莊誠皇太后懿旨前因皇帝市經親政決疑定策不能不遇事提撕勉允臣工之請訓政數年兩年以來皇帝幾餘典學益臻精進於軍國大小事務均能隨時剖決措置合宜深宮甚爲欣慰明年正月大婚禮成應卽親裁大政以慰天下臣民之望著欽天監於明年二月內敬謹選擇歸政吉期具奏○諭朕自沖齡踐阼仰蒙 慈禧端佑康頤昭豫莊誠皇太后垂鑒聽政聖功偉烈震古鑠今宵旰劬勞數十年如一日迨十二年六月 令朕親裁大政猶復曲垂 慈愛特允訓政之請勞心庶務又及兩年茲奉 懿旨於明年二月歸政朕仰體 慈躬敬慎謙抑之本懷並敬念三十年來聖母爲天下憂勞况瘁幾無晷刻可以稍資休息撫衷循省感悚交深茲復特沛溫綸重申前命朕敢不祇遵 慈訓於一切幾務兢兢業業盡心經理以冀仰酬我 聖母撫育教誨有加無已之深恩惟念現在時事孔艱嗣後仔肩益重爾中外大小臣工尤當體朕夙夜祇懼之誠各矢公忠共襄治理朕實有厚望焉所有歸政屆期一切應行典禮事宜著各該衙門敬謹酌議具奏○壬寅欽奉 慈禧端佑康頤昭豫莊誠皇太后懿旨欽天監奏遴旨選擇吉期恭候欽定一摺著於明年二月初三日歸政○癸卯楊昌濬等奏查臺灣改設行省案內接准部覆全登刑名案件仍歸臺灣道管理惟命盜等案問擬立決並斬

絞監候應入秋審及應行咨部案件是否由該道審勘詳解臺灣巡撫分別題奏咨部核覆應令妥議奏明辦理等因轉行遵照去後伏查臺灣命盜等案問擬斬絞並立決監候罪名向係臺灣道審勘擬解由福建按察使詳解福建巡撫勘審具題其應入秋審斬絞人犯由按察使審擬實緩詳請督撫督同在省司道審錄覆核定擬於五月內具題到部至尋常道車流犯及命盜擬徒人犯勿庸解省由道審擬移司詳請咨部核覆其命盜道車流犯仍照例解司覆審此向來辦理章程也今臺灣改設分省而臺灣道本兼按察使銜全臺刑名自應統歸管理且復添設按司獄一官體制與按察使相仿合屬刑名各案問擬凌遲斬絞立決監候及一切道車流徒應行題咨案件應請悉由臺灣道審擬應解勘者即詳解臺灣巡撫勘審分別題奏應核咨者即詳由巡撫咨部核覆以一事權至前項題奏咨各案請俟此次奏明准部覆之日遵照新章由臺辦理未准部覆以前應仍暫循其舊其應入秋審斬絞監候及籌事秋審應行覆審人犯請以光緒十五年為始由臺灣道照例擬詳惟臺灣巡撫係屬新設案卷不足須逐件赴福建省城鈔錄秋錄大典緩實最關緊要擬請暫行變通辦理每年由臣銘傳查明應勘人犯先期行道造冊飭臺北府具詳臣即督同藩司勘審錄供咨送督臣另敷擬定實緩飭發福建按察使造冊附於福建秋審冊後會銜具題以昭詳慎俟臺灣省城衙署造成案卷齊全再行奏請由臺辦理下部議奏○劉銘

傳奏據布政使邵友濂詳稱臺灣知縣一班本年春季病故數人先後三次請調閩省候補人員僅有李承緒一人領咨東渡今又病故續調實缺兩員現未到臺臺地煙瘴水土惡劣兩年之間病故屬縣十餘員奉調之員聞風裹足查各縣懸缺未補已積到八九缺現據代理鳳山縣知縣吳元翰稟報病勢沉重急需委員代理值此清丈甫竣給單升科在在均關緊要臺地竟無候補人員可以委署除再遴選閩省人員另請咨調外詳請速即察核辦理等情前來臣查臺灣現辦給單升科正當喫緊之際委用得力無如知縣一官照章咨調閩省人員地隔重洋已恐呼應不靈加以水土惡劣人人視為畏途近年所用清丈人員頗為實力耐勞熟習地方情形堪勝繁劇之任者以格於成例不容假以事權棄置可惜是合例者無人可用可用者不能合例徒使地方久懸要缺遴委無人未免貽誤覆查臺灣添設改設屬縣各缺暫准不論資格變通酌補原設各縣本難援照辦理惟現值清丈升科之際非熟悉情形能耐勞苦之員不能委用況現無候補人員可委可否仰懇 天恩俯念地方治理緊要稍寬例章或俟省城完工或以十年為限暫准不拘資格一體變通酌量補署以資治理請 旨飭部速即核議施行得 旨吏部速議具奏○甲辰諭軍機大臣等五月初九二十五兩次電諭升泰開導藏番勿再搆衅並責成第穆妥爲了事現尙未據該大臣奏報殊深廬系昨英使照會總署據稱接印督電信藏番現又添兵並有擾阻該大

臣不赴邊界之語此說未可遽信藏番雖愚昧不敢阻留欽使但派兵再出之事難保必無印信此次
電傳中有不能久待一語如果藏兵再出印兵亦必再進深恐兵連禍結並現界亦不可保該大臣務當
守定先解戰爭四字傳諭第穆切實辦理前奏有與英官面議之意目前事機緊要如親至邊界商辦先
令印藏彼此退兵再明訂彼此界址使此後不相侵犯自較派員前往更為妥協此時但使藏兵不再出
拉納之外印兵之不再進英人屢屢言之亦決不至失信該大臣現已到任一切情形著卽迅速奏聞○
諭彭玉麟奏痼疾難痊請開缺並開去差使回籍調理一摺彭玉麟巡閱長江勦勞卓著連年以來因
病屢請開缺未經允准茲復據奏病勢增重情詞懇切不得不勉如所請以示體恤兵部尚書彭玉麟著
准其開缺回籍安心調理其長江水師巡閱差使毋庸開去卽責成李成謀認真經理彭玉麟不必拘定
假期一俟病體稍愈仍著照舊任事以副朝廷倚畀至意○李鴻章奏前因直屬八項旗租地畝科則過
重閭閻無力全完於光緒八年奏請蠲減州縣經徵處分庶可稍緩追呼免致日事叢撲部議仍令嚴飭
州縣按十分抽數徵解當經轉行遵照惟頻年詳加體察全完實屬爲難有不能不量予變通者緣八項
旗租地本與民糧處處毗連民糧地畝徵銀在四分八釐以下者十居八九在四分八釐以上者十僅一
二並有每畝祇徵數釐者旗租地每畝須徵銀八分至一錢一分較民糧地科則所增不止倍徙雖民糧

地皆有差徭旗租地不盡有差徭但原定科則過重地之所出不足應上供之需且民糧地弓尺較大或以畝半作一畝或以數畝作一畝旗租地則無從弓尺偏枯殊甚故自嘉慶年間加重州縣經徵處分以來小民懼嚴刑比追往往棄地逃避爲人侵佔或反出資推租與人惟求不再承佃冀免後累其有捏報無糧黑地及自置產贖混升科者此等積弊各屬皆有而潯州安福蓋縣高陽交河固安爲尤甚實因科則過重遂致相率爲僞已數十年於茲非一朝夕之故也地方官初則失於覺察繼則難於摘伏不得已而代墊民欠近以地方凋敝官累日深墊辦不起始據實揭出該六州縣地吏瘠瘠未完之數各在二三分以上此二三分以上租既無著地亦莫得主名若不設法清盤必致弊端愈滋租地益少然積弊已久清盤極難且直屬地畝本無魚鱗冊可稽民間又扶同隱匿究竟侵佔及捏報升科之地各在何村何里一時無從追查牧令皆慮干戾視爲畏途不能久於其任非寬以歲月變通處分實屬無所措手據藩司松椿擬先將六州縣每年經徵八項旗地未完二三分以上積欠租銀暫於奏銷案內扣除不計處分自奉文起予限五年令其澈底清盤務將侵佔及捏報地畝逐漸查出卽陸續列入奏銷統計分數徵租以期規復原額其現在有著地畝應徵租銀奏銷內卽以十分計算如徵不足數照例參處等情前來臣查前次請將通州等七十州縣均減經徵處分是以部議未行今僅擇其尤甚者六州縣請將未完二三

分以上積欠租銀暫於奏銷案內扣除不計處分並無礙於全案該牧令既免嚴議庶可久於其任悉心清理租地漸有著落當於賦課有裨而民生亦不至大感下戶部議奏○乙巳李鴻章奏奉天威海衛等處海口前經添設防勇議建礮臺預量水雷一切需款甚鉅請將山海關加增贏餘關稅銀八萬兩留存關庫預備一切要需允之○丙午 上御 乾清宮受賀○湖南巴陵縣匪徒王聯露等糾眾滋事剿平之○戊申 萬壽聖節致祭 太廟後殿遺魁斌行禮○上詣 大高殿 壽皇殿行禮○己酉倪文蔚奏吏部咨行奏准酌擬河工出力人員從優准獎並預防流弊章程查原奏內開令於工竣列保時分段酌定保固年限隨摺奏明如限內有決口情事即將承辦之員獎案奏明暫行撤銷責令仍赴原工趕緊搶護俟修築完固奏明給還原獎等語此項堵合沁河漫口大工自應遵照辦理查例載修築堤岸黃河定限保固一年如有衝決分別年限內外將經修防守各官議處賠修完竣開復沁河伏秋大汛水勢動猛無異黃河是以黃汛一關兩河並主沁工保固年限亦宜照黃河定例為允惟堵築漫口與預修堤岸不同小楊莊工程經彰衡懷道曹秉哲遴派員弁會同河內武陟兩縣不分畛域併力堵合勢難劃分段落無從分段保固應請自工竣之日起照黃河一年之限由彰衡懷道及懷慶府河內武陟兩縣文武各掌場出具保固印結詳請咨部如年限內再有失事照例參處賠修以重要工而免虛糜下部知之○

毓英等奏雲南地居邊荒聚瘠苦候補人員向本無多逮至軍興捐保各案與正途並進遂致漸形擁擠現在滇省候補同通州縣至一百五十餘員佐貳雜職至一百八十餘員之多尙有已據稟到留省未經考驗者又百餘員差缺有數委用難周致有數年不得一差困苦難堪者其中類皆讀書明理之人即或仕版初登未嫻治體正當於需次時悉心講求今若一無所事坐困年年庸者無以自拔賢者亦無以自見識力莫由增長志氣漸就銷磨一旦付以政權非繫枘貽譏卽鋒芒自折抑亦吏治之隱憂也臣等以爲人員擁擠無法疏通人才短長端資造就查滇省武職候補人員已於同治十三年奏准每月課試一次月給獎銀以一千兩爲率至今各將弁技藝優劣頗著成效文武事同一律似亦未可無課且江蘇各省亦有文職月課章程前據司道詳請仿照蘇省添設文職月課由督撫兩司輪集候補各員出題課試試以策論評判者其爲政治民之道評定優劣酌給獎銀既稍恤其身家又可增其識力已於光緒十三年十二月起按月課試行之數月風氣漸覺改觀人才可期奮起月需獎銀不過四百餘兩所費無多而所裨於吏治民生者實非淺鮮擬嗣後每月獎銀不論人員多寡定以五百兩爲限在釐金項下按月提撥每屆年終彙同武職獎銀一併報銷以昭核實下部知之○庚戌李鴻藻電致李鴻章月來兩端增占勢鏗無已伏秋汛至雖與力爭欸料亦將不繼人力已窮不能前進萬不得已惟有暫請停緩俟秋汛

漸平再行舉辦祈代奏軍機大臣奉 旨李鴻藻等電奏已悉著趕緊固守已成之工不可再有失陷其引河挑溜挖淤工程仍應認真辦理不可停止冀大汛過臨分流掣溜稍減跑塘之患餘俟奏報到時再降諭旨